

అపొస్తుడు ఆతి పవులు రోమ పట్నమ్దు మన్ని దేవుణు సజమ్దివరిజ్ రాస్తి ఉత్తం.

నెల్వ కిబిసిని

యా ఉత్తం రాస్తికాన్ ప్రబు ఆతి యేసుక్రీస్తుజ్ అపొస్తుడు ఆతి పవులు. రోమాదు మన్ని దేవుణుదిజ్ నమ్మిత్తివరిజ్ యా ఉత్తం రాస్తాన్. రాస్తి కాలం క్రీస్తుయేసు యా లోకమ్దు వాజి సిలువాదు సాజి, మర్రి నోజ్జి పరలోకమ్దు సాహివెనుక 56 నమస్తం నడిఃమి (ఎ.డి 55-56) రాస్ను మంజిన. యా ఉత్తమ్దు ముకెలమాతిక ఇనిక ఇహిజ, క్రీస్తువందిజ్ వెప్పి సువార్త. సువార్త ఇహిజ ఇనిక, సువార్త నమ్మితివరిజ్ ఇనికెజ్ జర్గినె, వినకవందిజ్ రాసినాన్. మరి, దేవుణు లోకురిజ్ నీతినిజయ్ మన్నికార్ ఇజి ఎలాగ ఇడ్డినాన్, ప్రబు ఆతి యేసుక్రీస్తువలెహాన్ ఎలాగ విడుదల వానాద్ నన్ని సజతిజి వందిజ్ రాసినాన్.

¹ క్రీస్తుయేసుజ్ పణి కినికానాతి పవులు ఇని నాను యా ఉత్తం రాసిన. సువార్త వెప్తాజ్ దేవుణు నజి అపొస్తుడుజి వజి నిల్ప్తాన్.

² సేన కాలమ్కు ముజాలె, ఇహిజ, యేసు ప్రబు యా లోకమ్దు వానెండ మహివలెనె, దేవుణు మాటెజ్ రాస్తి మహి ప్రవక్తరుబాన్ దేవుణు యా సువార్త వందిజ్ వెప్పా ఇజి ఒపందం కిత్త మహాన్.

³ దేవుణు మరిసి వందిజె యా సువార్త. వీండ్రు లోకు వజి దావీదు రాజు తెగాదు పుట్టికాన్.

⁴ వీండ్రు దేవుణు వజి ఇహిజ, దేవుణు మరిసి ఇజి గొప్ప సత్తుదాన్ తోరె ఆతాన్. ఎలాగ ఇహిజ, వాండ్రు సాతి వరిబాణిజ్ మర్జి నిజితాన్. వాండ్రు మా ప్రబు ఆతి యేసు క్రీస్తునె.

5 క్రీస్తు దయాదర్శమదాన్ అపొస్తుడు వజ దేవుణు నజి కూక్తాన్. ఎందానిజ్ ఇహిజ, విజు జాతిదికార్ క్రీస్తుముస్కు నమకం ఇడ్డి, వన్నిజ్ మాడిసి, వన్నిజ్ లోజిజి మండ్రెజ్ ఇజి.

6 రోమ పట్నమ్దు యేసు క్రీస్తుజ్ నమ్మితికార్ ఆతి మీరుబా దేవుణు కూక్తి వరి లోఇ మన్నిదెర్.

7 దేవుణు ప్రేమ కిజి, వన్నిజ్ కేట ఆతి మిజి విజేరిజ్ నాను యా ఉత్రం రాసిన. బుబ్బాతి మా దేవుణుబాణిజ్, ప్రబు ఆతి యేసుక్రీస్తుబాణిజ్ కనికారమ్ని నిపాతి మిజి మనీద్ ఇజి నాను పార్దనం కిజిన.

రోమ పట్నమ్దు మన్ని నమ్మితివరిజ్ సొన్ని సుడెదెజ్ పవులు కోరిజినాన్

8 యా ఉత్రమ్దు తొలిత నాను మీరు విజిదెరె వందిజ్ దేవుణుదిజ్ వందనమ్కు వెహ్సిన. యేసు ప్రబువలెహాన్ నమ్మిత్తి దన్నివందిజ్ రోమ దేసెమ్దికార్ ఏలుబడి: కిని విజు బాడ్డిదు మన్ని లోకుర్ వెహ్సినార్.

9-10 నాను ఎస్తివలెబా పార్దనం కినివెలె మీ వందిజ్ వెహ్సిని సువార్త పూర్తి మన్నుదాన్ నాను కిజిన ఇజి నెసిని దేవుణునె దిన్నిజ్ సాసి. గాని నాను ఎలాగ ఇహిజ్బా ఏలు వాజి మిజి సుడెదెజ్ దేవుణు సీత్తం ఆదెజ్ ఇజి పార్దనం కిజిన.

11 ఎందానిజ్ ఇహిజ, మిజి వాజి సుడె:జి దేవుణు వందిజ్ బత్కిని బత్కుదు మిజి దయరం కిబిస్తెజ్ ఇజి ఆస ఆజిన.

12 ఎలాగ దయరం కిబిస్తెజ్ ఇహిజ మాటు ఒరెన్ వన్ని నమకమ్దాన్ మరి ఒరెన్ వన్నిజ్ దయరం వెహ్సెజ్వెలె.

13 నమ్మిత్తి తంబెరిజాండె, నాను నండొ సుట్కు మిజి సుడి: వాదెజ్ ఇజి ఆలోసనం కిత్త ఇజి మీరు నెస్తెజ్వెలె. గాని అబ్ఎండ ఆత. ఎందానిజ్ ఇహిజ, నండొ అడ్డుజ్ వాతె. మీ బాన్ వాజి మిజి సుడె:తిజి మీ బాణిజ్ మజి గొప్ప లాబం వాని లెకెండె. ఎందానిజ్ ఇహిజ మీ నన్ని

నండో జాతిజ నడిఃమి నాను సొని లెకెండ్ మీ నడిఃమిబా నాను వాజి సువార్త వెహైజె ఇజి. సువార్త వెంజి నమ్మిజి దేవుణు కొడోర్ ఆనార్.

14 యూదురు ఆఇ వరిజ్ విజేరిజ్ సువార్త వెహైజ్ నాను ఉండ్రీ అప్పు మన్నికాన్. గ్రీకు బాస నెస్తి వరిజ్బా, నెస్ఇ వరిజ్బా, పెరి సదువు మన్ని వరిజ్బా, సదువు సిల్లి వరిజ్బా వెహిసి సిదెజ్ ఇజి నజీ ఉండ్రీ అప్పు మనాద్.

15 అందెజె, రోమ పట్టుమదు మన్ని మిజిబా యా సువార్త వెహైజ్ ఇజి నాను గొప్ప ఆస ఆత మన.

16 ఎందానిజ్ ఇహిజ, నాను సువార్త వెహైజ్ సిగు ఆవి. యేసుక్రీస్తు మున్సు. నమకం ఇడ్ని విజేరిజ్ వరి పాపమ్కాణిజ్ రక్సిస్తాజ్ యా సువార్తదిజ్ దేవుణుబాణిజ్ ఒద్దె సత్తు మనాద్. యా సువార్త తొలిత యూదురిజ్ వెనుక ఆఇ జాతిజ సాటె ఆజినాద్.

17 యా సువార్తదు దేవుణు ఇనిక వెహిసినాన్ ఇహిజ, లోకు కిత్తి తప్పు పణిజ వందిజ్ వారు సిక్కు పొందిదెజ్ అక్కర్ సిల్లెద్ ఇజినె. వారు యేసుప్రబు మున్సు. నమకం ఇడ్ని వందిజె సిక్కుదాన్ తప్పె ఆతార్. యాక ముందాల్ ఒరెన్ దేవుణు ప్రవక్త రాస్తి లెకెండ్నె. “ఎయెర్ నీతినిజయ్సికాన్ ఇజి నాను ఇడ్త మనానో, వాండ్రు నా మున్సు. నమకం ఇడ్ని వందిజ్ ఎలాకాలం బత్కినాన్”.

దేవుణు లోకుర్ మున్సు. నండో కోపం ఆజినాన్

18 దేవుణువందిజ్ మన్సు సిల్లి లోకాజ్ విజేరిజ్ సెఇపణి కిని విజేరిజ్ దేవుణు సిక్కు సీనాన్ ఇజి పరలోకమ్దాన్ తోరిస్త మనాన్. ఎందానిజ్ ఇహిజ, వరి సెఇ పణిదాన్ దేవుణు వందిజె నెస్తిమన్ని నిజమాతికెజ్ విజి వారు అడ్డు కిజినార్.

19 దేవుణు వందిజ్ నిజమాతికెజ్ అర్దం కిదెజ్ వారు అట్నార్. ఎందానిజ్ ఇహిజ, దేవుణు ఎలాగమర్దికాన్ ఇజి వాండ్రు విజేరిజ్ తోరిస్త మనాన్.

20 మాపు దేవుణుదిజ్ నెస్ఎవ్ ఇజి ఎయెన్బా వెహైజ్ వీలు సిల్లెద్. ఎందానిజ్ ఇహిజ, దేవుణు ఎలాగ మర్దికాన్ ఇజి మాటు సుడెఃదెజ్

సిల్లె, గాని వాండ్లు లోకం తయార్ కిత్తిబాణిజ్ అసి లోకమ్దు తయార్ కిత్తి వనకబాణిజ్ వాండ్లు ఎలాగ మర్తికాన్ ఇజి ఎలాకాలం మన్ని వన్ని పెరిసత్తు ఎలాగమర్తిక ఇజి మాటు సుడఃజినాట్. అందెజె దేవుణుదిజ్ నెస్విన్ ఇజి ఎయెన్బా వెహైజ్ వీలు సిల్లెద్.

21 యూదురు ఆఇకార్, దేవుణు ఎలాగ మర్తికాన్ ఇజి నెస్టిజ్బా దేవుణు ఇజి మాడిస్ఎర్, వాండ్లు కిత్తి దన్నివందిజ్ వందనమ్కు వెహెవర్. నస్తివలె వారు దేవుణు వందిజ్ అర్దం కిదెజ్ అట్ఎండ ఆత్తారె. పరి ఆలోసనమ్కు నెఇకెజ్ ఆతె.

22 వారు బుద్ది మన్నికార్ ఇజి వెహె ఆజి బుద్ది సిల్లి పణిజ్ కిత్తార్.

23 ఎలాకాలం మంజిని దేవుణుదిజ్ పొగ్డిజినగవరం సిఎండ బొమ్మెజు పొగ్డిజి గవరం సిత్తార్. సబ్బిసాని లోకులెకెండ, పొటిజ్ లెకెండ, జమతుజ్ లెకెండ, మరి బూమి ముస్సు, ఊజి బూలాని వనకాజ్ లెకెండ తోర్ని బొమ్మెజు తయార్ కిత్తారె వనకాజ్ పొగ్డిజి గవరం సిత్తార్.

24 అందెజె వారు, కిదెజ్ ఆఇ ఆసెజ్ పరి మన్నుదు పుట్టి లెకెండ కిదెజ్, దేవుణు వరిజ్ సరి సిత్తాన్. ఇనిక ఇహిజు వారు వరిజె సుగు ఆతి సెఇ పణిజ్ కిత్తార్.

25 ఎందానిజ్ ఇహిజు, నిజమాతి దేవుణు వందిజ్, నిజమ్దిజ్ డిస్తారె నిజం ఆఇ దన్నిజ్ ఇత్తార్. విజు దన్నిజ్ పుటిస్తికాన్ ఆతి ఒరెండ్రె దేవుణుదిజ్, మాడిసి వన్నిజ్ లోజిఎండ, దేవుణు పుటిస్తి వనకాజ్ మాడిస్తార్, వనకాజ్ లోజిత్తార్. గాని పుటిస్తికెజ్ విజు అయ దేవుణుదిజె ఎస్తివలెబా మాడిస్సెజ్ వెలె.

26 అందెజె సిగు ఆతి ఒడెఃల్ ఆసెజు వందిజ్ దేవుణు వరిజ్ ఒపజెస్టాన్. అందెజె వరిలోఇ అయ్లికొడెఃక్ మాసిరిజ్ సాన్ఎండ అయ్లికొడెఃకాజ్ దరోట్ ఒడెఃల్ ఆస ఆజి మహై.

27 అయావజనె యూదురు ఆఇవరి లోఇ మొగకొడెఃర్ ఆల్నికాజ్ ఇడెవండ మొగకొడెఃర్ దరోట్ ఏక ఉత్పుత్ ఆజి మహై. వారు మొగకొడెఃర్ వెట సిగు ఆతి పణిజ్ కిత్తార్. అయ ఒద్దె తప్పు ఆతి పణిజ్ వరిజ్ తగితి సక్స ఆజి వరిముస్సు వాతాద్.

28 వారు దేవుణుడికి నెక్టపోక్టారె వన్ని వందికి నెస్తిమన్ని నిజమాతికెక్ విజు డిస్టసితార్. నస్తివలె వరి సెఇ బుద్ధిదు నడిదెక్ ఇజి దేవుణు వరిక్ డిస్టసిత్తాన్. అందెజె సరి ఆఇ పణిక్ కిదెక్ వరి బుద్ధి మహ్దాద్.

29 విజు రకమ్కాణి సెఇ పణిక్ కిదెక్ వారు ఏక ఒడ్ఁబినార్. ఇనికెక్ ఇహిజు, మహి వరిక్ సెడ్డ కిదెక్, మహివరిక్ మన్నికెక్ మజి దోహ్కెక్ ఇజి సెఇ ఆస ఆదెక్, ఎలాగబా మహివరిక్ సెఇక కిదెక్, మహివరి వెట గోస ఆదెక్, సప్తెక్, గొడఁబ కిబిస్టెక్, మొసెం కిదెక్, మహివరివందిక్ సెఇకెక్ వెహ్తెక్, సొండి వెహ్తెక్.

30 నండొ లోకుర్ మహివరివందిక్ తప్పుక్ వెహ్సినార్. నండొండార్ దేవుణు ఎద్దు వెత్రేకం కిజినార్, ఆఇవరిక్ సిగు కిబిస్నార్, గర్త ఆజినార్, పొజిజనికార్ ఆజినార్, మరి రెకరకమ్ది కొత్త సెఇపణిక్ ఎలాగ కిదెక్ ఇజి సుడఁజినార్, వరి కొడొర్ అయ్సి అప్పొసిరిక్ లొజివర్.

31 వారు అర్దం కిదెక్ అట్వర్. ఒవందం కిత్తిలెకెండ్ కివర్. నండొండార్ వరి సొంత ఇండ్రొణివరిక్ నెగెండ తొవర్. నండొండార్ కనికారం సిల్లికార్ ఆజినార్.

32 నిన్ని పణిక్ కనివరిక్ సప్తెక్ వలె ఇజి దేవుణు వెహ్తా మనాన్ ఇజి నెస్తిక్బా వారు నిన్ని సెఇ పణిక్నె కిజి మంజినార్. అక్కాదె ఆవిండ నిన్ని సెఇ పణిక్ కినివరిక్ వారు డగ్రు కిజినార్.

2

దేవుణు సరియాతి తీర్పు తీరిస్నాన్

1 మహికార్ తప్పు కినికార్ ఇజి మీరు వెహ్సి వరిముస్కు తీర్పు తీరిసినిదెరా? ఆహె వెహ్సిజు మీరు మిజినె తప్పు కినికిదెర్ ఇజి వెహ్సినిదెర్. మాపు తప్పు కిఇకాప్, ఇజి వెహ్తెక్ మీరు అట్ఇదెర్. ఎందానిక్ ఇహిజు, మీరుబా వరిలెకెండ్ తప్పు కినికిదెర్.

2 తప్పు కిని యూదురు ఆఇవరిక్ దేవుణు తీర్పు తీరిస్సివలె వరిక్ సరియాతి తీర్పు తీరిస్నాన్ ఇజి మాటు నెసినాట్.

3 అందెజె ఆఇ లోకుర్ పాపం కినికార్ ఇజి వెహ్నిని మీరు అయ పాపమ్కునె కిజి మహిజ దేవుణు తీర్పుదాన్ తపై ఆఇదెర్ ఇజి నెస్టెజ్వెలె.

4 దేవుణు మీవెట వన్ని గొప్ప విలువాతి దయ,కనికారం తోరిసినాన్. అక్క మీరు ఇజిరి కణకదాన్ సుడఃజినిదెరా? దేవుణు మీవెట తోరిసిన కనికారం మీరు పాపమ్కు ఒప్పుకొడఃజి డిఃసిసీని వందిజ్నె ఇజి మీరు నెన్ఇదెరా?

5 గాని మీరు మీ మన్సుదు గొప్ప గర్త ఆజి పాపమ్కు ఒప్పుకొడఃజి డిఃసిసివిండ మహిజ దేవుణు తీర్పు కిని రోజుదు మీ మున్సు సిక్స నండో కుంబ కిజినిదెర్. దేవుణు విజు లోకురిజ్ ఉండ్రె లెకెండ్ తీర్పు కిని దినమ్దు మిజిబా తీర్పు కినాన్.

6 దేవుణు ఒరెన్ ఒరెన్ వన్నిజ్ వారు కిత్తి పణిజ తగితిక మర్జి సినాన్లె*

7 దేవుణుబాణిజ్ జాయ్ని గవరం, సావు సిల్లి బత్తు దొహ్కెజ్ ఇజి డిఃసివిండ నెగ్గి పణిజ్ కిజి మహివరిజ్ దేవుణు ఎలాకాలం బత్కిని బత్తు సీనాన్.

8 గాని నజీ నానె నెగెండ మండ్రెజ్ ఇజి సుడఃజిని వరిజ్, దేవుణు వెహ్నిని నిజమాతి మాటదిజ్ డగ్రు కివిండ ఒద్దె సెఇపణిజ్ కినివరిజ్, దేవుణుబాణిజ్ గొప్ప కోపం వానాద్.

9 పాపం కిజినె మంజిని ఒరెన్ ఒరెన్ వన్నిజ్ బాదెజ్ వానె. కస్టమ్కు వానె. నన్ని కస్టమ్కు యూదురుజ్ మొదొల్లినె. వెనుక యూదురు ఆఇ వరిజ్ వానె.

10 గాని నెగ్గి పణిజె కినివరిజ్దేవుణు వన్ని గొప్ప జాయ్ని గవరం, సాంతి సీనాన్. ముందాల యూదురిజ్ని వెనుక యూదురు ఆఇ వరిజ్ సినాన్.

11 ఎందానిజ్ ఇహిజ, దేవుణు లోకాజ్ తీర్పు కినివలె తేడ తొవిండ తీర్పు కినాన్లె.

12 విజెరి లోకుర్ పాపం కిత్తిజ్ విజెరిజ్ సక్స వానాద్. దేవుణు మోసెజ్ సిత్తి రూలుజ్ వందిజ్ యూదురు ఆఇకార్ నెన్వితార్.

* 2:6 2:6 కీర్తన 62:12; సామెత 24:12.

అందెజె “మీరు ఎందానిజ్ రూలుజు లోజిఇతిదెర్?”, ఇజి వరివెటు వెహ్‌వీన్. దేవుణు మోసెజ్ సిత్తి రూలుజ్ నెస్తి యూదురుజ్ సిక్సీదెజ్ దేవుణు తీర్పు కినాన్. ఎందానిజ్ ఇహిజు వారు రూలుజు లోజివితార్.

13 నీతినిజయ్కాన్* ఎయెన్ ఇహిజు, దేవుణు రూలుజ్ వెహికాన్ ఆవీన్, అయ రూలుజ్ లోజిత్తికాండ్రె.

14 దేవుణు యూదురిజ్ సిత్తి రూలుజ్ యూదురు ఆఇవరిజ్ సివితాన్. అహిజ్‌బా వారు అయ రూలుజ్ వజు బత్తిత్తిజ్, అయ రూలుజ్ వారు నెస్తిమనార్ ఇజి మాటు నెసినాట్. అయ రూలుజ్ వరిజ్ సిల్లు గాని మన్నిలెకెండ్ వారు నడిజినార్.

15 అయ రూలుజ్ వరి మన్నుదు ఇడె ఆతె మన్నె ఇజి వరి పణిజాణ్ తోరిసినార్. ఒరెన్ నెగ్గి పణిజ్ కిత్తిజ్‌బా సెఇ పణిజ్ కిత్తిజ్‌బా అక్కెజ్ నెగ్గికెజ్, సెఇకెజ్ ఇజి వన్ని మన్నుదు నెసినాన్. అహె దేవుణు సిత్తి రూలుజ్ వన్ని బుద్దిదు మన్నె.

16 లోకుర్ వరి మన్నుదు ఎయెరిజ్ నెన్‌వండ ఇడ్డిమన్ని ఆలోసనమ్‌కు వందిజ్‌బా, దేవుణు తీర్పు కిని రోజుదు తీర్పు సీనాన్. యేసు క్రీస్తు వెట యాకెజ్ విజు జర్గిజినె ఇజి నాను వెహ్పిని సువార్తదు మనాద్.

దేవుణు మోసెజ్ సిత్తి రూలుజ్ వజు నడినికాప్ ఇజి వెహ్పిని యూదురువందిజ్

17 ఏలు యూదురు ఆతి మిజి ఉండ్రె మాటు నాను వెహ్పా. మాపు యూదుర్ ఇజి మీరు వెహ్పినిదెర్. దేవుణు మోసెజ్ సిత్తి రూలుజ్ వజు నడినికాప్, అందెజె దేవుణు తీర్పుదాన్ తపై ఆదెజ్ ఆనాప్, ఇజి మీరు ఒడిబిజినెదెర్. దేవుణు కొడెర్ ఇజి పొగ్‌డె: ఆజినెదెర్.

18 దేవుణుదిజ్ ఇస్తిమాతిక ఇనిక ఇజి మీరు నెస్సిదెర్. దేవుణు రూలుజు వందిజ్ నెగెండ నెస్తిజ్, డగ్గు కిదెజ్ విజు దన్నిజ్ మిస్తి ఏలువాతికెజ్ ఇనికెజ్ ఇజి మీరు నెసినెదెర్.

* 2:13 2:13 దేవుణు మున్ను నమకం ఇడ్డి మన్ని పాపమ్‌కు దేవుణు మాయిత్తికాన్.

19 గుడ్డివరిజ్ సరి తోరిసి నడిఃపిసిని వరిలెకెండ, యూదురు ఆఇవరిజ్ సరియాతి సరి వెప్పి నడిఃపిస్తెజ్ అట్వాప్ ఇజి మీరు వెప్పినిదెర్. సీకటిదు నడిఃపిసి వరిజ్ జాయ్ తోరిసిని వరిలెకెండ మీ మాటెజాణిజ్ యూదురు ఆఇవరిజ్ దేవుణు సరి తోరిసినిదెర్ ఇజి వెప్పినిదెర్.

20 బుద్ధి సిల్లివరిజ్, యూదురు ఆఇవరిజ్ నెస్పిస్తెజ్ అట్వాప్ ఇజి మీరు ఒడిఃబిజినిదెర్. కొడోర్ లెకెండ మన్నివరిజ్, ఇహిజ దేవుణు వందిజ్ నిజమాతికెజ్ నెన్ఇ వరిజ్ నెస్పిస్తెజ్ అట్టికాప్ ఇజి ఒడిఃబిజినిదెర్. ఎందానిజ్ ఇహిజ, రాస్తిమన్ని దేవుణు మాటదు మన్నివిజు వనకాజ్ ఇంక ఒద్దె విలువాతి గెణం మరి నిజమాతి మాట మీబాన్ మనాద్గదె.

21 మహివరిజ్ నెస్పిసిని మీరు, మిజి మీరె నేర్పె ఆఇదెరా? డోజి కిమాల్ ఇజి గటిజ వెప్పిని మీరు డోజి పణి కిజినిదెరా?

22 రంకు బూలాదెజ్ ఆవద్ ఇజి వెప్పిని మీరు రంకు బూలాజినిదెరా? దెయమ్కాజ్ డిస్తి సిత్తి మీరు దెయమ్క గుడిఃదికెజ్ డోజి కిజినిదెరా?

23 దేవుణు రూలుజ్ మాబాన్ మన్నె ఇజి వెప్పి మీరు అయా రూలుజ లోజివండ దేవుణుదిజ్ సిగు తపిసినిదెర్.

24 “మీరు ఈహు కిత్తిజ్ దేవుణు పేరు యూదురు ఆఇకార్ దూసిసినార్☆”, ఇజి దేవుణు మాటదు రాస్తి మన్నిక, మీ వందిజ్బా రాస్తి లెకెండె.

25 దేవుణు మోసెజ్ సిత్తి రూలుజ్ వజి మీరు నడిఃజినిదెర్ ఇహిజ మీరు సునతి ఆతి వందిజ్ మీజి లాబం మనాద్. గాని దేవుణు సిత్తి రూలుజ మీరు లోజిఇతిజ మీరు దేవుణు లోకుర్ ఇజి తోరిస్తెజ్ సునతి కిబె ఆఇ యూదురు ఆఇవరిలెకెండ మీరు.

26 అయావజనె, సునతి కిబె ఆఇతిజబా దేవుణు సిత్తి రూలుజ వజి నడిఃపి యూదురు ఆఇకార్ వన్ని సొంతలోకుర్ లెకెండ వాండ్రు ఇడ్వాన్గదె.

☆ 2:24 2:24 యెసయ 52:5; యెహీ 36:22.

27 సునతి కిబె ఆఇకార్ గాని దేవుణు రూలుజు లోజీని మిజీ తీర్పు కినార్. ఎలాగ ఇహిజు, మిజీ రూలుజు విజు రాస్తి మహిజ్బా, సునతి కిబె ఆతిజ్బా అయా రూలుజు లోజీఇతిజ్ యూదురు ఆఇకార్ మిజీ తీర్పు కినార్.

28 దేవుణు లోకుర్ ఇజి తోరిస్తెజ్ ఇనికాదో అలవాటుజ్ లెకెండ్ కినికాన్, నిజమాతి యూద వాండ్రు ఆవన్. దేవుణు లోకుర్ ఇజి తోరిస్తెజ్ మీ ఒణ్డోల్దిజ్ ఇనికాదో కిత్తిజు దేవుణు ఒపుకొణాన్ ఇజి ఒణ్డోబిమాట్.

29 గాని, నిజమాతి యూద వాండ్రు ఎయెన్ ఇహిజు, మన్ను మారిస్తికాండ్రె నిజమాతి యూద వాండ్రు. దేవుణు ఆత్మదాన్ మన్ను మారిస్తికారె దేవుణు లోకుర్. దేవుణు లోకుర్ ఆదెజ్ ఇజి మరి ఇనికబా కిదెజ్ ఆవద్. నన్ని వరిజ్ లోకుర్ పొగ్డిఃఇతిజ్ గాని దేవుణు వరిజ్ పొగ్డిఃనాన్.

3

దేవుణు నమ్మిదెజ్ తగ్గికాన్.

1 అహిజు, యూద వాండ్రు ఇజి ఇని లాబం మనాద్? సునతి కిబె ఆతికాన్ ఇజి ఇని లాబం మనాద్ ఇజి మీరు వెప్పిదెరను?

2 దన్నిజ్ నాను వెప్పిని విజు సజతిజులోఇబా గొప్ప లాబమ్నె! ఎలాగ ఇహిజు, దేవుణు వాండ్రు కిత్తిమన్ని ఒపందమ్కు మన్ని వన్ని మాటెజ్, ముజాల మా అనిగొరుజ్నె సితాన్.

3 అహిజు, యూదురు నంణెండార్ దేవుణుదిజ్ నమ్మిదెజ్ తగ్గికార్ ఆవెతార్. వారు నమ్మిదెజ్ తగ్గికార్ ఆఇతిజ్, దేవుణు వాండ్రు వెప్తిలెకెండ్ కివన్ ఇజి వెప్పినిదెరా?

4 నాను వెప్పు, ఆహె ఇండ్రెజ్ ఆవద్. దేవుణు వెప్తిలెకెండ్ వాండ్రు కినాన్. లోకుర్ దేవుణు వెట వెప్తిలెకెండ్ కిఎండ అబద్దం వెప్తికార్ ఆతిజ్బా, దేవుణు నిజమ్నె వెప్పున్. దావీదు రాజు దన్నివందిజ్ కిర్తన పుస్తకమ్దు ఈహు రాస్త మనాన్. దేవుణు ఈహు

వెహ్లాన్, “నీను వర్గినివలె నీ మాటెజ్ నిజమాతికెజ్ ఇజి లోకుర్ వెహ్లాన్. లోకు నీ ముస్సు నేరం మొహ్లాజ్ సుడఃజినివలె వారు గెలిస్తెజ్ అట్వండానార్లే☆.

5 మాటు తప్పు కినివలె దేవుణు మా పాపమ్కు సెమిసి వాండ్రు నీతినిజయ్లు మన్నికాన్ ఇజి ఒద్దె తోరిసినాన్. అందెజె మాటు తప్పుజ్ కిత్తివందిజ్, మజీ సిక్స సిత్తిజ దేవుణు నాయం కినికాన్ ఆవన్ ఇజి వెహ్లాకార్ మనార్.

6 ఆహె ఇండ్రెజ్ ఆవద్. ఎందానిజ్ ఇహిజ దేవుణు నాయం కినికాన్ ఆవన్ ఇహిజ, విజేరె లోకాజ్ తీర్పు కిదెజ్ మన్ని అతికారం ఎలాగ మంజినాద్.

7 ఎయెన్బా, “నాను తప్పు వెహ్లా”, ఇజి వెహ్లాన్సు. గాని నాను తప్పు వెహ్లా ఇహిజ దేవుణు నిజమ్నె వెహ్లానాన్ ఇజి తోర్జినాద్. అందెజె లోకుర్ దేవుణుదిజ్ పొడఃడిఃనార్. అహిజ దేవుణుదిజ్ పొగ్డు వానివలె నాను తప్పు కిత్తిదన్నిజ్ దేవుణు నజీ తీర్పు సీజి సిక్స సీదెజ్ ఆవద్ ఇజి మీరు వెహ్లాదెన్సు.

8 అయాలెకెండ్ వెహ్లాక నిజం ఇహిజ, దేవుణు పొగ్డః ఆపిన్ ఇజి మాటు పాపం కిజి మండ్రెజ్నా? నానుబా ఈహు వెహ్లాన ఇజి సెగొండార్ తప్పు మొప్పినార్. ఈహు వెహ్లావరిజ్ దేవుణు తీర్పు తీరిసి తగితి సిక్స సీనాన్.

దేవుణు ఎద్రు నిజమాతికాన్ ఎయెన్బా సిల్లెన్.

9 అహిజ ఏలు ఇనిక వెహ్లాట్? మాటు యూదురు, యూదురు ఆఇవరిజ్ ఇంక ఫెరికాటా? ఆఎట్. యూదురిజ్ని యూదురు ఆఇవరిజ్ విజేరిజ్ దేవుణు తీర్పు కినాన్ ఇజి నాను వెహ్లాగదె. ఎందానిజ్ ఇహిజ, పాపం విజేరిజ్ అడిగి ఇణ్ణినాద్.

10 దేవుణు మాటదుబా దిన్ని వందిజ్ రాస్తమనాద్. ఇనిక ఇహిజ, “ఎయెన్బా నీతి మన్నికాన్ ఆవన్, నీతిమన్నికాన్ ఒరెన్బా సిల్లెన్”.

11 సరియాతి ఇనిక ఇజి అర్దం కినికాన్ ఒరెన్బా సిల్లెన్. దేవుణుదిజ్ నెస్తెజ్ ఇజి రెబానికాన్బా సిల్లెన్.

☆ 3:4 3:4 క్రిస్టస 51:4.

12 విజేరె ఉండ్రెలెకెండ సెఇవణిజ్ కినికార్ ఆతారె దేవుణుబాణిజ్ మహ్నా సొహార్. సరియాతి పణి కినికార్ ఎయెర్బా సిల్లెర్. ఒరెన్బా సిల్లెన్☆”,

13 “లోకుర్ మాటెజ్ ఎలాగ మన్నె ఇహిజు, పీనుగుదిజ్ మూస్తి వెనుక మర్రి లాగితిజు ఎలాగ కంపు డెయ్నాదొ, అయాలెకెండెనె. మాటెజాణిజె మొసం కిజినార్☆. సరాసి వినం లోకాజ్ ఎలాగ పాడె: కినాదొ అయాలెకెండెనె వారు మాటెజాణిజ్ పాడె: కినార్”☆.

14 “వారు ఆఇవరిజ్ సయిప్ కిజినె మంజినార్. ఆఇవరిజ్ దూసిసినార్.”☆

15 లోకాజ్ సప్తెజ్ వరిజ్ సులునె వానాద్.

16 వారు సొనిబాన్ విజు నాసనం కిజినార్, లోకాజ్ గొప్ప కస్టమ్కు తప్పిసినార్.

17 ఆఇవరి వెట సమాదనమ్దాన్ బత్కిదెజ్ ఎసెజ్బా నెన్ఎర్.”☆

18 వరి మన్నుదు దేవుణు ఇహిజు ఇని తియెల్ నీల్లికార్.

19 దేవుణు మాటాదు రాస్తిమన్నికెజ్ విజు దేవుణు ఎయెరిజ్ వన్ని రూలుజ్ సిత్తాండ్రొ వరివందిజె ఇజి మాటు నెసినాట్. అందెజె యూదురు గాని యూదురు ఆఇకార్ గాని మా పాపమ్క వందిజ్ దేవుణు ఎద్రు ఇనికబా వెహ్విండ మంజినాట్. విజెరె తప్పుకిత్తికార్ ఇజి దేవుణు వెప్పినాన్.

20 దేవుణు మోసెజ్ సిత్తి రూలుజ్ వజు కిత్తిదన్నివందిజ్ దేవుణు ఎయెరిజ్బా నీతినిజయ్తికాన్ ఇజి వెహ్ఎన్. ఎందానిజ్ ఇహిజు దేవుణు రూలుజ్ నెస్తిమహిజ్బా మాటు ఎస్సానొ తప్పుజ్ కిత్తికాట్ ఇజి నెస్త మనాట్.

క్రీస్తుమున్ను నమకం ఇడ్డికాండ్రె నీతిమన్నికాన్ ఆనాన్.

21 గాని లోకుర్ దేవుణు ఎద్రు ఎలాగ నీతినిజయ్తికార్ ఆదెజ్ అట్పార్ ఇజి దేవుణు ఏలు మరి ఉండ్రె సుటు తోరిస్త మనాన్. మోసెజ్ సిత్తి రూలుజు లోజిత్తివలెహాన్ ఆవద్. గాని దిన్నివందిజ్ మోసెజ్ సిత్తి

☆ **3:12 3:12** కీర్తన 14:1-3; 53:1-3. ☆ **3:13 3:13** కీర్తన 5:9. ☆ **3:13 3:13** కీర్తన 140:3. ☆ **3:14 3:14** కీర్తన 10:7. ☆ **3:17 3:17** యెసయ 59:7,8.

రూలుదు మరి ఒరెన్ దేవుణు ప్రవక్తరు రాస్తి మాటెజ లొఇబా తోరిస్త మహాద్.

22 యేసుక్రీస్తు ముస్కు నమకం ఇడ్తివరి పాపమ్కు విజు దేవుణు మాయిష్టాన్. దేవుణు సుడెఃతిజ యూదురుని యూదురు ఆఇకార్ ఇజి తెడెః ఇనిక సిల్లెద్. ఎయెర్ నమ్మిజినారొ దేవుణు వరి పాపమ్కు విజు మాయిష్టాన్. వారు నీతి నిజాయి మన్నికారె.

23 ఎందానిజ్ ఇహిజ, విజేరె పాపం కిత్తారె దేవుణు తయార్ కితిమన్ని గొప్ప జాయ్ పొందిదెజ్ అట్ఎండాతార్.

24 గాని క్రీస్తుయేసు మా వందిజ్ సాతిజ్, అయ సావుదాన్ మాటు కిత్తి పాపమ్కు వందిజ్ వాని సిక్సదాన్ దేవుణు మజి డిఃబిస్తాన్. ఎలాగ ఇహిజ, తప్పు కిత్తికార్ ఇహిజ్బా, అయ తప్పుజ్ నాను నెమిస్త మన్న ఇజి దయాదర్మమ్దాన్ ఉండ్రె ఇనాయం లెకెండె సెడినె సీజినాన్.

25 లోకురి పాపమ్క వందిజ్ వాని సిక్స వన్ని ముస్కు తపిసి, వన్ని సావుదాన్ లోకురి పాపమ్కు వరి నమకమ్దాన్ దేవుణు నెమిసిని వందిజె యేసుక్రీస్తుజ్ పొక్తాన్. ఎందానిజ్ ఈహు కిత్తాన్ ఇహిజ, దేవుణు నీతినిజయ్ మన్నికాన్ ఇజి తోరిస్తెజె. ఎందానిజ్ ఇహిజ యేసు వాని ముందాల లోకుర్ పాపం కిత్తిమహివలె దేవుణు అక్కెజ్ ఓరిసి మహాన్. పాపం కిత్తివలె సిక్స సివతాన్.

26 గాని దేవుణు అయ పాపమ్కు పోస్ఎన్. యేసు అక్కెజ్ విజు వన్నిముస్కు ఒత్తాండ్రె వరివందిజ్ సాతాన్. దేవుణు నీతిమన్నికాన్ ఇజి ఈహు తోరిస్తాన్. యేసు ముస్కు నమకం ఇడ్తికార్ నీతినిజయ్కార్ ఇజి ఇడ్తార్.

27 అందెజె ఏలు, మోసె సిత్తి రూలుజు లొజిత్తిజ్ నీతిమన్నికాట్ ఆతాట్ ఇజి పొగిడిఃదెజ్ అట్ఎట్, యేసుక్రీస్తుజ్ నమ్మితిజానె మాటు కిత్తి పాపమ్కు విజు దేవుణు మాయిష్టాన్ ఇజి దేవుణు వహాన్. అయావజనె మాటు నీతి మన్నికాట్ ఆనాట్.

28 రూలుజు లొజిత్తిజు ఆవద్, యేసుక్రీస్తుజ్ నమ్మితిజానె పాపమ్కు విజు మాయిపె ఆజి నీతి మన్నికార్ ఆతార్ ఇజి దేవుణు వెహాన్. యాక మాటు నెసినాట్.

29 దేవుణు, వహి యూదురిజ్నె దేవుణు ఆవన్గదె, మహి జాతిది వరిజ్నెబా దేవుణుగదె. ఒబ మహి జాతిదివరిజ్నెబా దేవుణునె.

30 ఒరెండ్రె దేవుణునె మనాన్. వాండ్రు యూదురిజ్నెని యూదురు ఆఇ వరిజ్నెని విజేరిజ్నె వరి నమకం వందిజ్నె పాపమ్కు విజు మాయిప్పి, నీతి మన్నికార్ ఆతార్ ఇజి వెహ్సాన్.

31 అహిజ క్రిస్తు ముస్కు నమకం ఇడ్డిజ్ దేవుణు ఎద్రు నీతి మన్నికార్ ఇజి దేవుణు వెహ్సాజ, రూలుజ విలువ సిల్లెద్ ఇజి ఒడఃబినిదెర్ను. సిల్లె, రూలుజ్ విలువ సిల్లెకెజ్ ఆఱ. యేసుక్రిస్తు ముస్కు నమకం ఇడ్డి మహిజ్ అయ రూలుజ్ మరి మరి లోజిదెజె.

4

నమకమ్దాన్ అబ్రహాం నీతి నిజాయ్ మన్నికాన్ ఆతాన్

1 అహిజ గొప్ప పేరు మన్ని మా అనిగొగొ ఆతి అబ్రాహాము నీతిమన్నికాన్ ఇజి దేవుణు వెహ్సా వందిజ్నెఇనికె వెహ్సాజ్?

2 వాండ్రు కిత్తి నెగ్గి పణిజ వందిజ్నె దేవుణు వన్నిజ్ నీతి నిజయ్కాన్ ఇజి ఇడ్డిజ దన్నివందిజ్ లోకురు వెట పొగిడిదెజ్ అట్నాన్ గాని దేవుణుబాన్ పొగ్గడె ఆదెజ్ అట్వన్.

3 ఎందానిజ్ ఇహిజ దేవుణు మాటాదు ఇనిక రాస్త మనాద్ ఇహిజ, “దేవుణు అబ్రాహాము వెట కిత్తి ఒవందం వాండ్రు నమ్మితాన్. అందెజె వాండ్రు నీతినిజయ్కాన్ ఇజి దేవుణు ఒప్పుకొటాన్”☆.

4 ఒరెన్ పణి కిత్తిదన్నిజ్ కూలి దొహ్క్తిజ అయాక ఇనాయం ఆవద్ గదె. అక్క వన్ని కూలినె. నీతినిజయ్కాన్ ఆదెజ్ ఇహిజబా అయాలెకెండ్లె.

5 గాని, తప్పు కిత్తివన్ని తప్పుజ్ దేవుణు మాయిప్పి నీతినిజయ్ మన్నికాన్ ఇజి ఇడ్నాన్. నమ్మిని వన్ని నమకమ్దాన్, వాండ్రు నీతినిజయ్కాన్ ఇజి దేవుణు ఇడ్నాన్. గాని, వన్ని పణిజాణిజ్ నీతినిజయ్కాన్ ఆవన్.

☆ 4:3 4:3 ఆది 15:6.

6 దిన్నివందిజ్ దావీదురాజుబా కిర్తన పుస్తకమ్దు రాస్త మనాన్. ఇనిక ఇహిజ, నమకం ఇడ్డివందిజ్ నీతినిజయ్కార్ ఇజి దేవుణు ఇడ్డికార్ గొప్ప సర్ల ఆతికార్. వరి పణివందిజ్ ఆవద్, నమకం వందిజె.

7 పాపం కిత్తిదన్నిజ్ దొహ్కొ సెమ వందిజ్ వారు సర్ల ఆనికార్. ఎందానిజ్ ఇహిజ, వరి తపుజ్ మరి ఎత్తు కిఎ ఇజి దేవుణు తీర్మనం కిత్తాన్.

8 ఎయెర్ది పాపమ్కాజ్ దేవుణు లెక్క తొవండ్రొ వాండ్రు సర్ల ఆతికాన్.*

9 పాపమ్కాజ్ దేవుణు సెమిస్తి దన్నివందిజ్ మన్ని సర్ల సునతి ఆతి యూదురిజ్నె ఆవద్. సునతి కిబెఆఇ యూదురు ఆఇ వరిజ్బా మనాద్. అబ్రహాం దేవుణు దేవుణుదిజ్ నమ్మిత్తాన్. అందెజె వాండ్రు నీతినిజయ్క మన్నికాన్ ఇజి దేవుణు ఒప్పుకొటాన్ ఇజి మాటు నెసినాట్గదె.

10 ఎస్తివలె దేవుణు అబ్రహాం వందిజ్ యాలెకెండ్ వెహ్తాన్? సునతి కిబె ఆవండ ముజుల్నా? సునతి కిబె ఆతి వెనకానా? అబ్రహాం నీతిమన్నికాన్ ఇజి ఎస్తివలె దేవుణు వెహ్తాన్ ఇహిజ, సునతి కిబె ఆని ముందాలెనె అబ్రహాం నీతిమన్నికాన్ ఇజి దేవుణు వెహ్తాన్.

11 వెనుక అబ్రహాం సునతి కిబె ఆతాన్. ఎందానిజ్ ఇహిజ దేవుణు ముస్సు. నమకం ఇడ్డి వందిజ్ వాండ్రు నీతి మన్నికాన్ ఆతాన్ ఇజి గుర్తు వందిజె. సునతి కిబె ఆవండ మహివలె దేవుణుదిజ్ నమ్మిత్తివరి పాపం దేవుణు మాయిష్టాన్. నన్నివరిజ్ బుబ్బలెకెండ్ దేవుణు అబ్రాహాముజ్ ఇడ్డాన్.

12 అయావజనె నమకం ఇడ్డి సునతి కిబె ఆతివరిజ్బా అబ్రహాం బుబ్బలెకెండ్నె. సునతి కిబె ఆవండ మహివలె నమకం ఇడ్డి బుబ్బాత్తి అబ్రహాం లెకెండ్ వారు. వారుబా అయా నమకమ్నె ఇడ్డార్.

13 దేవుణు అబ్రహాం వెట ఉండ్రొ ఒట్టు కిత్తాన్. ఇనిక ఇహిజ, అబ్రహామ్జ్ని వన్ని కొడొ; కొక్రారిజ్ యా లోకమ్దిజ్ సీన ఇజి. యా ఒట్టు అబ్రాహాముజ్ ఎలాగ దొహ్కొద్ ఇహిజ దేవుణు సిత్తి విజు

* 4:8 4:8 కిర్తన 32:1,2.

రూలుజ్ వాండ్రు లొజిత్తి వందిజ్ ఆవద్. దేవుణు ముస్కు నమకం ఇట్టివెలె నీతినిజయ్కాన్ ఆతాన్ కాక యా ఒట్టు దేవుణు బాణిజ్ దొహ్కాద్.

14 రూలుజు లొజిత్తి వరిజె, దేవుణు సిత్తి ఒట్టు దొహ్కాద్ ఇహిజు, దేవుణు ముస్కు ఇడ్డి నమకమ్దిజ్ ఇని విలువ సిల్లెద్. ఆహె ఆతిజు దేవుణు సిత్తి అయ ఒట్టుబా విలువ సిల్లెండ మనాద్.

15 రూలుజ్ మన్నె ఇహిజు లోకు వనకాజ్ లొజివిండ సిక్కు తపిసినార్. ఎంబె రూలుజ్ మహిజ్బా లోకుర్ వనకాజ్ లొజివిర్.

16 నమకం ఇడ్డి రూలుజు లొజిత్తి యూదురునె ఆవద్ అబ్రహాంలెకెండ దేవుణు ముస్కు నమకం ఇడ్డివరిజ్ విజేరిజ్ యా ఒట్టు దొహ్కాద్. దేవుణు ముస్కు నమకం ఇడ్డివరిజ్ అబ్రహాం ఒరెన్ బుబ్బువజనె.

17 “నాను నిజి నండొ జతిజు బుబ్బు లెకెండ ఏర్పాటు కిత్త మన్న”, ఇజి దేవుణు అబ్రహాం వెట కిత్తి ఒట్టు దేవుణు మాటాదు రాస్త మనాద్. సాతివరిజ్ బత్తు సీజినాన్. వన్ని మాటదాన్ సిల్లివనకాజ్ మన్నిలెకెండ కూక్కినాన్, యా దేవుణు. వన్నిజె అబ్రహాం నమ్మిత్తాన్. దేవుణు ఎద్రు, యా ఒట్టువలెహాన్ మజి విజేరిజ్ అబ్రహాం బుబ్బులెకెండ ఆతాన్.

18 దేవుణు అబ్రాహముజ్ వెహ్తా మాటెజ్ జర్గిదెజ్ కస్తమాతికెజ్ గాని అక్కెజ్ జర్గినె ఇజినె నమ్మిజి ఎద్రునుండెజి మహాన్. అందెజె నండొ జాతిజు బుబ్బువజ ఆని ఇజి దేవుణు వెహ్తా మాటెజ్లెకెండె వాండ్రు ఆతాన్. నీ కొడొర్ ఆగనమ్దు మన్ని లెక్క కిదెజ్ అట్ఇ నస్సా సుక్కెజ్లెకెండ నండొడార్ ఆనార్లె ఇజి దేవుణు వెహ్తా మాటెకెండె జర్గితాద్.

19 అబ్రాహముజ్ డగ్గు డగ్గు వంద పంటెజ్ ఆత మహాద్. “నాను నిస్సా డొక్క ఆత. నా అల్లి సారాయిబా కొడొర్ ఇడ్డెజ్ అట్విద్”, ఇజి ఒడెబీజి మహాన్. అహిజ్బా దేవుణు వెహ్తా మాటెజ్ అబ్రహాం ఇని అనుమానం సిల్లెండ నమ్మిత్తాన్.

20 వన్ని నమకం డిఁసవతాన్. దేవుణు కిత్తి ఒట్టు వందిజ్ అనుమానం ఆవతాన్. దేవుణు వెప్తిలెకెండ్ జర్గినాద్లె ఇజి నమ్మిత్తాండ్రె దేవుణుదిజ్ పొగడితాన్.

21 దేవుణు ఒవందం కిత్తిలెకెండ్ కిదెజ్ అట్నాన్ ఇజి పూర్తి నమ్మిత్తాన్.

22 అందెజె దేవుణు మాటదు రాస్త మనాద్, “అబ్రహాం దేవుణుదిజ్ నమ్మిత్తాన్. అందెజె దేవుణు వన్నిజ్ నీతినిజయ్తి మన్నికాన్ ఇజి ఇడ్డాన్”, ఇజి

23 నీతినిజయ్తికాన్ ఇజి ఇడె ఆతాన్”, ఇజి దేవుణు మాటాదు రాస్తి మన్నిక అబ్రహాం ఒరెన్ వందిజె ఆవద్.

24 మా వందిజ్బా నీతినిజయ్తి మన్నకార్ ఇజి దేవుణు ఇడ్డ మనాన్ ఇజి రాస్త మనాద్. సాతివరిబాణిజ్ యేసుక్రీస్తుజ్ నిక్తి దేవుణు మున్ను నమకం ఇడ్డి మా వందిజ్బా నీతినిజయ్తికార్ ఇజి రాసె ఆతమనాద్.

25 మా సెఇ పణిజి వందిజె యేసు క్రీస్తుజ్ సప్తార్. సాతివరిబాణిజ్ దేవుణు వన్నిజ్ నిక్తిజ్, మా పాపమ్కు విజు సెమిస్తాండ్రె మజి దేవుణు వెట కూడిత్తికార్ ఇజి ఇడ్డాన్.

5

దేవుణు వెట మజి సాంతి సమదనమ్ని సర్ల ఆజినాట్

1 మా ప్రబు ఆతి క్రీస్తు మావందిజ్ సాతాన్ ఇజి మాటు నమ్మిత్తిజ్, మాటు దేవుణు వెట కూడ్జి మంజినాట్. అందెజె దేవుణు వెట సాంతి సమదనం వాత మనాద్.

2 యేసుక్రీస్తు మా వందిజ్ సాతిజ్ ఏలు దేవుణు మజి తోరిస్తి దయాదర్థం మాటు నెస్త మనాట్. దేవుణు ఎస్సానొ గొప్పవాండ్రు ఇజి నెస్తాటె వన్ని గొప్ప జాయ్దు మాటుబా మంజినాట్లె ఇజి ఎద్రుసుడ్జి మంజినిలోఇ సర్ల ఆజినాట్.

3 అక్కాదె ఆవిండ, క్రీస్తుమున్ను నమకం ఇడ్డి వందిజ్ వాని క్లమ్కలోఇ సర్లదాన్ మంజినాట్. ఎందానిజ్ ఇహిజ, అయ క్లమ్కు వాతిజ్ అక్సెజ్ ఎలాగ బరిస్తిజ్ ఇజి మాటు నెస్తెజ్ ఆనాద్.

4 కష్టమేకు వానివలె అక్కెజ్ బరిస్తిజ మాటు నెగ్గి గుణమ్కు మన్నికార్ ఇజి దేవుణు మా వందిజ్ ఒప్పు కొండేజినాన్. నెగ్గి గుణమ్కు మన్నికార్ ఇజి ఒప్పుకొటిజ మాటు ఆసదాన్ ఎద్దుసుండేజి మంజినాట్.

5 దిన్ని వందిజ్ మాటు ఎద్దు సుండేజి మన్నిజ్ అక్క నిజమ్నె జర్గినాద్ ఇజి సుండేజినాట్. ఎందానిజ్ ఇహిజ దేవుణు మజి ప్రేమిసినాన్ ఇజి మా మన్నుదు మాటు నెగెండ నెస్తాట్. మజి సిత్తి మన్ని దేవుణు ఆత్మదానె దేవుణు మా ముస్కు మన్ని ప్రేమ వందిజ్ నెసినాట్.

6 ఎలాగ ఇహిజ, మాటు ఇనికబా కిదెజ్ అట్వండ మహివలె దేవుణు ఏర్పాటు కిత్తి కాలమ్దు, దేవుణు వందిజ్ బక్తిసిల్లి వరివందిజ్ క్రిస్తు సాతాన్.

7 నీతినిజయ్ మన్ని వన్నివందిజ్ ఒరెన్ సాదెజ్ ఇహిజ కష్టం. నెగ్గికాన్ ఆతివన్నివందిజ్ ఒరెన్ సానాన్సు.

8 గాని దేవుణు మజి ఎసానొ ప్రేమిసినాన్ ఇజి తోరిస్తాన్. ఎలాగ ఇహిజ మాటు దేవుణు వేట వెత్తేకమ్దాన్ అజసరి నడిసి మహివలెనె క్రిస్తు మా వందిజ్ సాతాన్.

9 అందెజె, క్రిస్తు మా వందిజ్ సాతిజ్ మాటు నీతిమన్నికాట్ ఇజి దేవుణు ఇడ్డిమన్నిక నిజమె. అహిజ, ఎలాకాలం మంజిని సిక్కదాన్ మాటు క్రిస్తువెట తప్రె ఆనాట్ ఇజి మన్నిక ఒద్దె నిజమాతిక.

10 ఎందానిజ్ ఇహిజ, మాటు దేవుణు వెట పగ అస్తి మహివలె దేవుణు మరిసి మా వందిజ్ సాతాండ్రె మజి దేవుణు వెట కూడుఃప్తాన్. అహిజ ఏలు దేవుణు వెట మాటు కూడితాట్ ఇహిజ, మరి నండో మజి గెల్పిస్తెజ్ క్రిస్తు అట్నాన్ ఇజి మాటు నెసినాట్. వాండ్రు మరేజి నిజిత్తిజ్నె యా గెలుపు మజి వాతాద్.

11 అక్కాదె ఆవిద్, మా ప్రబు ఆతి యేసుక్రిస్తు మా వందిజ్ సాతి వందిజ్ని మా వందిజ్ కిత్తి పణి వందిజ్ సర్ల ఆజినాట్. యేసుక్రిస్తు బాణిజ్ మాటు దేవుణువెలె సమదనం మన్నికాట్ ఆతాట్.

ఆదాముని క్రిస్తు

12 ఏలు నాను ఉండ్రీ వెహ్ను, ఒరెన్ లోకు, ఇహిజ ఆదాం పాపం కిత్తిజ్ పాపం యా లోకమ్దు డూగితాద్. పాపం కిత్తిజ్ ఆదాం సాతాన్. అందెజె యా లోకమ్దు విజేరె సాజినార్. విజేరె పాపం కిత్తిజ్ విజేరె సాజినార్.

13 దేవుణు మోసెవెట రూలుజ్ సిఎండ మహివలె లోకుర్ పాపం కిజి మహార్. గాని వారు కిత్తి తప్పుజ లెక్క సుడెఎతాన్. ఎందానిజ్ ఇహిజ రూలుజ్ సిల్లెండ మహాద్కాక రూలుజ్ తప్తార్ ఇజి ఇన్ఎన్.

14 గాని ఆదాం బత్కితి మహి కాలమ్దాన్ మోసె కాలమ్దాక బత్కిజి మహికార్ సాతార్. ఎందానిజ్ ఇహిజ ఆదాం కిత్తి పాపం లెకెండ వారు కివెతార్ గాని వారుబా పాపం కిత్తార్. ఆదామ్ని వెనుక వాతి క్రీస్తు ఉండ్రెలెకెండ్రె. ఎలాగ ఇహిజ ఆదాం కిత్తి పణిని క్రీస్తు కిత్తి పణి విజేరిజ్ కూడిత వాతాద్.

15 గాని రిఎర్బా ఉండ్రె లెకెండ్రె ఆవర్. దేవుణు సెడినె సిత్తి ఇనాయం తతాన్. మరి ఒరెన్ విజేరిజ్ సాపు తతాన్. గాని యేసు క్రీస్తు వన్ని దయాదర్మమ్దాన్ తత్తి ఇనాయం ఒద్దె పెరికాదె. దేవుణు విజేరిజ్ సెడినె సిత్తి వన్ని దయాదర్మమ్నె అయ ఇనాయం.

16 ఆదాం కిత్తి పాపమ్దాన్ వతిదన్నిజ్ క్రీస్తు సెడినె సిత్తి ఇనాయమ్దిజ్ లోఇ మరి ఉండ్రీ తేడ మనాద్. ఇనిక ఇహిజ, ఆదాం ఉండ్రీ పాపం కిత్తిజ్ దేవుణుబాణిజ్ తీర్పు తతాన్. గాని క్రీస్తు దేవుణుబాణిజ్ తత్తి ఇనాయం అయాలెకెండ్రె ఆవద్. సెడినె దోహ్క్తి అయ ఇనాయం ఇనిక ఇహిజ దేవుణు లోకురిజ్ నీతినిజయ్కార్ ఇజి ఇడ్నికదె. నీతినిజయ్కార్ ఇజి దేవుణు లోకురిజ్ ఇడ్నిని అయ ఇనాయం వాతిజ్, లోకుర్ కిత్తి విజు పాపమ్క వందిజ్ “మీ పాపమ్కు విజు నాను మాయిప్ప”, ఇజి దేవుణు వెహండ్రె వరిజ్ నీతినిజయ్కార్ ఇజి ఇడ్నాన్.

17 ఒరెన్ లోకు తప్పు కిత్తిజ్ లోకుర్ విజేరె సాజినారె, సాపు లోకురిజ్ ఏలుబడిః కిజినాద్. గాని మరి ఉండ్రీ ఒద్దె నిజమె, ఇనిక ఇహిజ, యేసు క్రీస్తు ఇని మరి ఒరెన్ కిత్తి పణిదాన్, దేవుణు బాణిజ్ గొప్ప దయాదర్మమ్ని సెడినె దోహ్క్తి నీతినిజయ్కార్ ఇనికెజ్ వాతిజ్

అక్కెజ్ మా బత్తుదు ఏలుబడిః కిజినె.

18 ఆహె ఒరెన్ వన్ని తవుదాన్ దేవుణు బాణిజ్ తీర్పు వాతి లెకెండ, మరి ఒరెన్ వన్ని నీతి పణిదాన్ విజేరె తీర్పుదాన్ తపై ఆదెజ్ అట్వార్. యా నీతి పణి, వరిజ్ ఎలాకాలం బత్కిని బత్కు తతాద్.

19 ఎలాగ ఇహిజ ఒరెన్ లోకు దేవుణుదిజ్ లోజిఏండ మహివలె ఎలాగ లోకుర్ విజేరె తపు కిత్తికార్ ఆతారో, అయాలెకెండనె మరి ఒరెన్ లోకు దేవుణుదిజ్ లోజితిజ్ దేవుణు లోకురిజ్ నీతినిజయ్ మన్నికార్ ఇజి ఇడ్తాన్.

20 దేవుణు రూలుజ్ లోకురిజ్ వాతివెలె తపుజ్ నండో కిజినావ్ ఇజి లోకర్ నెస్తార్. గాని తపుజ్ నండో ఆతివెలె దేవుణుది గొప్ప దయాదర్మమ్బా దన్నిజ్ ఇంక నండో పిరిజి వాతాద్.

21 పాపం నండో ఆజి వాతివలె లోకుర్ సావుదిజ్ తగిజి వాతార్. గాని ఏలు దేవుణు లోకురిజ్ నీతినిజయ్ మన్నికార్ ఇజి ఇడ్డిజ్ గొప్ప దయాదర్మం లోకుర్ ముస్కు ఏలుబడిః కిజినాద్. ఎందానిజ్ ఇహిజ మా ప్రబు ఆతి యేసుక్రీస్తు కిత్తి పణిదాన్ ఎలాకాలం బత్కిని బత్కు వాదెజ్ ఇజి.

6

పాపం వందిజ్ సాతికాట్గాని క్రిస్తవెట బత్కినికాట్.

1 అహిజ, ఏలు ఇనిక వెహ్నాట్? మాటు పాపం కిత్తివెలె దేవుణు గొప్ప దయాదర్మం తోరిస్తాన్ ఇహిజ ఏలు మరి నండో దయాదర్మం తోరిస్తెజ్ ఇజి మరి నండో పాపమ్కు కిజినె మండ్రెజ్నా?

2 ఆవిద్, మాటు పాపం కిజినె మండ్రెజ్ ఆవిద్. ఎందానిజ్ ఇహిజ, పాపం కిదెజ్ ఆస మాటు డిఃస్తాట్. నన్ని అనెజ్ డిఃస్తిజ్ పాపం కిజినె మండ్రెజ్ అట్ఏట్టె.

3 యేసు క్రిస్తు వెట కూడఃదెజ్ ఇజి బాప్తినం పొందినివలె మాటుబా వన్నివెట సాతాట్ ఇజి విజేరిజ్ వెహ్నాట్. ఇక్క మీరు నెస్తెజ్ వలె.

4 అందెజె క్రిస్తు సాతి వెనుక బూమి లోఇ వన్ని పీనుగు ఎలాగ మూసె ఆతాదో, అయాలెకెండనె బాప్తినం పొందితివెలె మాటుబా

వన్నివెట మూసె ఆతి లెకెండ్ ఆతాట్. ఎలాగ ఇహిజ, పాపం కిదెజ్ మన్ని ఆసవందిజ్ బత్తిదెజ్ అట్ఏండ ఆజినాట్. బుబ్బతి దేవుణుది గొప్ప జాయ్ మన్ని సత్తుదాన్ యేసుప్రబు ఎలాగ సావుదాన్ మర్రి నీజితాండ్రో అయాలెకెండ్ మాటుబా ఉండ్రీ కొత్త బత్తుదు మండ్రెజ్ అట్నూట్.

5 మాటు మా పడాయ్ బత్తు డిసిసీజి యేసుక్రీస్తు వెట వన్ని సావుదు కూడితాట్ ఇహిజ యేసుక్రీస్తు సావుదాన్ మర్రి నీజిత్తి లెకెండ్ మాటుబా తప్ఏండ ఉండ్రీ కొత్త బత్తుదు వన్నివెట కూడేజి మంజినాట్.

6 ఒరెన్ ఎజమాని అడిగి పణికినికాన్ లోజిజి మంజినిలెకెండ్, మాటు పాపం కిదెజ్ మన్ని ఆసదిజ్ లోజిజి మండ్రెజ్ అవద్. అందెజె యేసుక్రీస్తు సిలువాదు సాతివెలె పాపం కిదెజ్ మన్ని మా ఆసిజబా అయ సిలువాదు సప్తి లెకెండ్నె. యాక మాటు గుర్తు కినాట్.

7 సాతిసాహికాన్ పాపం కిదెజ్ మన్ని ఆసిజాణిజ్ డిబె ఆతికాన్గదె. అయాలెకెండ్ మాటుబా డిబె ఆతాట్.

8 అహిజ, మాటు క్రీస్తు వెట సాతి లెకెండ్ ఇహిజ, క్రీస్తు వెట బత్తిత్తి లెకెండ్ మాటుబా వన్నివెట బత్తినాట్ ఇజి నమ్మిజినాట్.

9 క్రీస్తు సాతిజ్ దేవుణు క్రీస్తుజ్ సాతి పరిబాణిజ్ మర్రి నిక్తాన్. వాండ్రు మరి సావన్. అందెజె సావు వన్ని ముస్కు అతికారం కిదెజ్ అట్ఏద్ ఇజి మాటు నెసినాట్.

10 క్రీస్తు సాతివెలె లోకురి పాపమ్క వందిజ్ ఉండ్రె సుటునె సాతాన్. గాని మర్రి బత్తిత్తివెలె దేవుణు వందిజ్ బత్తిజినాన్.

11 అయాలెకెండ్ మీరుబా పాపం కిదెజ్ మన్ని ఆసదిజ్ సాతికార్ ఇజి మిజి ఇడ్డు. మరి యేసుక్రీస్తు వెట కూడితి మహిజ్ దేవుణుదిజ్ ఇస్టమాతి బత్తు బత్తిజినిదెర్ ఇజి ఇడ్డు.

12 అందెజె, పాపం కిదెజ్ మన్ని ఆసెజ్, సాజి సాని మీ ఒణ్డోల్దు ఏలుబడి: కిదెజ్ అవద్. ఎందానిజ్ ఇహిజ, పాపం కిదెజ్ మన్ని ఆసెజ్ వజ కిబిసైజె అక్క సుండేజినాద్.

13 పాపం మీ ముస్కు ఏలుబడి: కిజి సెఇ పణిజ్ కిదెజ్ వాడుకొని

అయుదమ్కులెకెండ్ మీ ఒడొల్దది బాగమ్కాజ్ వాడుకొండొమాట్. గాని సావుదాన్ బత్కుదు వాతివరిలెకెండ్ మీ ఒడొల్దదెజ్ దేవుణుదిజ్ ఒప్పుజెప్పెజ్. నస్తవలె మీ ఒడొల్లి బాగమ్కు నీతినిజయ్దు మన్ని పణిజ్ కిదెజ్ వాడుకొని అయుదమ్కులెకెండ్ ఆనె.

14 పాపం కిదెజ్ ఇజి ఆస మీ ముస్కు ఏలుబడిః కిదెజ్ ఆవద్. ఎందానిజ్ ఇహిజ దేవుణు తీర్పుదాన్ తప్పె ఆదెజ్ ఏలు మోసె సీత్తి రూలుజ లొజిదెజ్ అవ్సరం సిల్లెద్. గాని పాపం కివిండ మండ్రెజ్ ఏలు దేవుణు దయాదర్పుం మీ ముస్కు ఏలుబడిః కిజినాద్.

నీతినిజయ్దు మన్ని బత్కు బత్కిదెజ్ ఇజి మన్ని ఆసదిజ్ మీరు వెటిపణి కినివరిలెకెండ్ లొజిజి మంజినిదెర్

15 ఏలు మాటు దేవుణు మోసెజ్ సీత్తి రూలుజ అడిగి మంజినిజ్, పాపం కిజి మండ్రెజా? ఆవద్, ఎసెజ్బా ఆవద్.

16 ఇనిక ఇహిజ యాక నిజం ఇజి మీరు నెసినిదెర్. ఎయెన్బా వెటిపణి కినివన్ని లెకెండ్ ఒరెన్ ఎజుమానిజ్ లొజిజి మండ్రెజ్ నూణివలె, అయ ఎజుమానిజ్ వెటిపణి కినికాన్ ఆజినాన్గదె. పాపమదిజ్ లొజిత్తిజ సావు తపిసినిదెర్. దేవుణుదిజ్ లొజిదెజ్ ఒప్పుకొటిజ దేవుణు మిజి నీతినిజయ్దుకార్ ఇజి ఇడ్నాన్.

17 ముందాల్ మీరు ఇస్టం ఆతి వజ పాపం కిజి, పాపం కిదెజ్ మన్ని ఆస ఇని ఎజమానిజ్ వెటిపణి కినికార్ లెకెండ్ మహిదెర్. గాని వెనుక మిజి దేవుణు వందిజ్ నెస్పిన్తి దన్నివందిజ్ మీరు పూర్తి మన్నుదాన్ నెస్తిదన్నిజ్ లొజిత్తి మన్నిదెర్. దిన్నివందిజ్ నాను దేవుణుదిజ్ వందనమ్కు వెప్పిన్.

18 పాపం కిదెజ్ మన్ని ఆసెజాణిజ్ దేవుణు మిజి డిఃబిన్సి దన్నిజ్ నాను దేవుణుదిజ్ వందనమ్కు వెప్పిన్. దేవుణు ఎద్దు నీతినిజయ్దు మన్ని బత్కు బత్కిదెజ్ ఇజి మన్ని ఆసదిజ్ మీరు వెటిపణి కినివరిలెకెండ్ లొజిజి మన్ని దన్నిజ్బా నాను దేవుణుదిజ్ వందనమ్కు వెప్పిన్.

19 దేవుణు వందిజ్ నిజమాతికెజ్ అర్థం కిబిన్జెజ్ ఇజి నాను అర్థం కిబిసిని మాటెజ్ వెప్పిన్. ఏలుదాక మీరు వెటిపణి కినివరి లెకెండ్

మీ ఒడొలది బాగమ్కు సెఇపణిజ్ కిదెజ్ మరి ఒద్దె సెఇకెజ్ కిజి, పాపం కిదెజ్ మన్ని ఆసెజ్ లొజిత్తి మహిదెర్. ఏలు దేవుణుదిజ్ కేట ఆతివరిలెకెండ్ నీతినిజయ్ పణిజ్ కిజి దేవుణుదిజ్ వెటిపణి కినికార్ లెకెండ్ మీ ఒడొలదిజ్ నడిపిస్తు.

20 మిజి ఇస్టం ఆతివజ బత్కిజి పాపం కిదెజ్ మన్ని ఆసెజ్ లొజిజి మహివలె మీరు నీతినిజయ్ దాన్ బత్కిదెజ్ ఇజి ఎయెర్బా మిజి డటం వెహ్వతార్.

21 గాని ఏలు మిజి సిగు తపిసిని నన్ని బత్కు మిజి ఇని లాబం తెవతార్. అయ బత్కుదాన్ దేవుణుబాణిజ్ దూరం మండ్రెజ్ నె ఆతార్. నన్ని బత్కు దేవుణు ఇనిక తనాద్ ఇహిజ సావునె తనాద్.

22 గాని ఏలు పాపం కిదెజ్ మన్ని ఆస మీ ముస్కు ఏలుబడిః కివిండ మీరు దన్ని ముస్కు గెలిస్తెదెర్. దేవుణుదిజ్ వెటిపణి కినికార్ లెకెండ్ ఆతిదెర్. నన్ని బత్కుదాన్ వాతి ఉండ్రి పండులెకెండ్ మీరు దేవుణుదిజ్ కేట ఆతి లోకుర్ ఆతిదెర్. నస్తవలె ఎలాకాలం బత్కిని బత్కు దోహ్క్కాద్.

23 పాపమిదిజ్ లొజిజి మహివరిజ్ దోహ్క్కి కూలి ఎలాకాలం మన్ని సావు. గాని మా ప్రబు ఆతి క్రీస్తుజ్ నమ్మితివరిజి ఎలాకాలం బత్కిని బత్కు దేవుణు సెడినె సీనాన్.

7

అలు మాసిర్ నడిమి మన్ని రూలుజ్

1 యేసుప్రబుజ్ నమ్మితి మా తంబెరిజాండె, రూలుజి వందిజ్ నెసినివరి వెట నాను యాక వెహ్సిన. ఇనిక ఇహిజ ఒరెన్ లోకు బత్కిజి మహివలె ఉండ్రెనె రూలుజి లొజిజి మండ్రెజ్ గదె.

2 ఎలాగ ఇహిజ, పెండ్లి ఆతివందిజ్ మన్ని రూలుజి సుడొతిజి, ఉండ్రి అయ్లి కొడొః దన్ని మాసివెట మంజినాద్ గదె. గాని మాసి సాతసాహన్ ఇహిజ అది వన్నిజ్ పెండ్లి ఆతిలెకెండ్ మండ్రెజ్ అవ్ నరం సిల్లెద్ గదె. అది మాసివెట మండ్రెజ్ ఇజి మన్ని రూలుజిబాణిజ్ డిబె ఆతార్.

3 రూలువజ నుడొఱిజ, మాసి బత్తిజి మహివలె మరి ఒరెన్ వెట అది సొహిజ, అది రంకు బూలానికాద్ ఇనార్. గాని మాసి సొతిజ పెండ్లి ఆతి మన్ని రూలుదిజ్ లొజిజి మండ్రెజ్ అవ్సరం సిల్లెద్. వెనుక మరి ఒరెన్ వన్నిజ్ పెండ్లి ఆతిజ అది రంకు బూలానికాద్ ఇజి ఇన్వర్.

4 అయాలెకెండెనె మా తంబెరిజాండె, యేసుప్రబు వెట మీరుబా సొతిలెకెండె ఆతిదెర్. అందెజె దేవుణు మోసెజ్ సిత్తి రూలుజ్ లొజినిబాణిజ్ మీరు డిఁబె ఆతిదెర్. మాసి సొతికాద్ మరి ఒరెన్ వన్నిజ్ పెండ్లి ఆతిలెకెండె ఏలు మీరు, సొతివరిబాణిజ్ దేవుణు నిక్తి క్రీస్తువెట కూడిఱిదెర్. ఎందానిజ్ ఇహిజ, మా బత్తుడాన్ దేవుణువందిజ్ నెగ్గి పట్టు పండెజ్ ఇజి.

5 ఒడొల్ది నెఇ ఆసెజ్ వజ కిదెజ్ ఆస ఆని మన్ను మజి అడిజిమహివలె పాపం కిబిసైజ్ తగితి ఆసెజ్ మా ఒడొల్ది బాగమ్కాజ్ ఏలుబడిఁ కిజి మహె. దేవుణు మోసెజ్ సిత్తి రూలుజ్ మాటు నెస్తివలె యా ఆసెజ్ పిరితిజ్ పాపం కిజి మాటు సొపు తపిసిని పట్టు పండిస్తాట్.

6 గాని ఏలు యేసుప్రబు వెట సొతిలెకెండె మహిజ రూలుజ వెటివణి కినిదన్నిదలాన్ డిఁబె ఆతాట్. రాస్తిమహి అయ రూలుజ ఏలు మాటు వెటివణి కినికార్ ఆవట్. ఏలు మాటు దేవుణు ఆత్మదిజ్ వెటివణి కినివరివజ ఉండ్రె కొత్త బత్తిజినాట్.

దేవుణు మోసెజ్ సిత్తి రూలుజ్

7 ఏలు మాటు ఇనిక వెహ్నాట్? దేవుణు మోసెజ్ సిత్తి రూలుజ్ పాపం కిదెజ్ మన్ని ఆసెజ్ పుటిసినాద్. అందెజె అయ రూలుజ్ నెఇకెజ్ ఇజి వెహ్నాటా? అట్వట్, ఆహు వెహ్నాజ్ ఆవద్. గాని పాపం కిజిన ఇజి నాను ఎలాగ నెస్త ఇహిజ, దేవుణు మోసెజ్ సిత్తి రూలుజాణిజ్ నెస్తమన్ను. ఎలాగ ఇహిజ, ఆఇవరిజ్ మన్ని వనకాజ్ వందిజ్ ఆస ఆమాట్ ఇజి మోసె సిత్తి రూలుదు వెహ్విండె మంజినిక ఇహిజ, అక్క దేవుణు ఎద్రు పాపమ్కు ఇజి నెన్వెతా మరి.

8 ఆఇ వరిజ్ మన్ని వనకాజ్ వందిజ్ ఆస ఆమాట్ ఇజి రూలు మహిజ్నె, నన్ని ఆసెజ్ పుట్టిజ్ నాను వనకవందిజ్ ఆస ఆత. పాపం

కిమాట్ ఇజి రూలుజ్ సిల్లెండ మంజినిక ఇహిజ పాపం కిదెజ్ మన్ని ఆస మా ముస్సు ఏలుబడిః కివద్.

9 రూలుజ్ నెన్వీండ మహివలె నాను ఇని బాద సిల్లెండ బత్కిజి మహా గాని రూలుజ్ నెస్తి వెనుక నాను తప్త ఇజి నెస్త. దేవుణుబాణిజ్ దూరం ఆత ఇజి నెస్త.

10 రూలుజు లోజీతిజు ఎలాకాలం బత్కిని బత్కు వానాద్ ఇజి నాను ఒడఃబిత్త గాని అయ రూలుజుణిజ్ నా సావుదిజ్ తీర్పు వాత ఇజి నెస్త మన్న.

11 ఎలాకాలం బత్కిని బత్కు వానాద్ ఇజి నాను మొసెం కిబె ఆత. అయ రూలుజ్ నాను తప్తానె సావుదిజ్ తీర్పు తత్త.

12 అందెజె దేవుణు మోసెజ్ సిత్తి రూలుజ్ దేవుణుబాణిజ్ వాతికెజ్. లోకుర్ ఎలాగ నడిదెజ్ ఇజి మన్ని ఆడెజ్ నీతినిజుత్తికెజ్, నెగ్గికెజ్.

13 అహిజ, దేవుణు మోసెజ్ సిత్తి రూలుజ్ నెగ్గికెజ్ గాని నజీ సావుదిజ్ తీర్పు తత్త ఇజి వెప్తాజా? ఆవద్, అహు ఆవద్. రూలుజ్ నెగ్గికెజ్నె గాని పాపం కిదెజ్ నజీ మన్ని ఆస యా రూలుజుణిజ్ ఒద్దె పెరిక ఆజి తోరె ఆతాదె నాను దేవుణుబాణిజ్ దూరం ఆత. రూలుజ్ ఎందానిజ్ సిత్తాన్ ఇహిజ పాపం కిదెజె మన్ని మా ముస్సు తోరిస్సెజె. రూలుజు వజ బత్కిదెజ్ అట్వీండ, మాటు పాపం కినికాట్ ఇజి తోరిస్సెజె ఇక్కెజ్ పణిదిజ్ వాతె. ఆహె మాటు ఎస్సానొ పాపం కినికాట్ ఇజి నెస్సెజె యా రూలుజ్ పణిదిజ్ వాతె.

14 దేవుణు మోసెజ్ సిత్తి రూలుజ్ దేవుణు ఆత్మదాన్ వాతికెజ్ ఇజి మాటు విజీటె నెసినాట్. గాని నాను ఇహిజ నావందిజె ఎత్తు కిజిని ముస్సుదాన్ మన్న. పాపం కిదెజ్ మన్ని ఆసదిజ్ ఒరెన్ వెటిపణి కినివన్నిలెకెండ లోజిజి మంజిన.

15 ఎలాగ ఇహిజ, నాను కినికెజ్ ఎందానిజ్ ఆహె కిజిన ఇజి నాను అర్థం కివ. కిన ఇజి నండొ సుట్కు ఒడఃబినికెజ్ కివండ ఆజిన. కిదెజ్ ఇస్టం సిల్లికెజ్ నండొ సుట్కు కిజిన.

16 కిదెజ్ ఇస్టం సిల్లి సెఇకెజ్ నాను కినివెలె ఉండ్రీ నెసిన. ఇనిక ఇహిజ దేవుణు రూలుజ్ నెగ్గికెజ్నె ఇజి నెసిన.

17 అందెజె, కిదెజ్ ఇస్టం సిల్లి సెఇకెజ్ నాను కినివెలె, అక్క నాను ఆవ, నా లొఇ మన్ని పాపమ్నె అక్కెజ్ కిబిసినె.

18 ఒడొఁల్ది సెఇ ఆసెజ్ వందిజ్ ఎత్తు కిని నా మన్నులొఇ నెగ్గికెజ్ ఇనికెజ్ సిల్లు ఇజి నాను నెసిన. ఎలాగ ఇహిజు, నెగ్గికెజ్ కిదెజ్ ఇస్టం మనాద్ గాని కిదెజ్ ఆట్వ.

19 కిస ఇజి ఒడొఁబిత్తి నెగ్గి పణిజ్ నాను కివ. కిదెజ్ ఆవద్ ఇజి ఒడొఁబిత్తి సెఇ పణిజ్నె కిజిన. కిత్తిజు

20 కిదెజ్ ఆవద్ ఇజి ఒడొఁబిత్తి సెఇ పణిజ్ కిత్తిజు అక్క కినిక నాను ఆవ. నా లొఇ మన్ని పాపమ్నె అక్కెజ్ కిబిసినె.

21 అహిజు, ఇనిక జర్రిజినాద్ ఇహిజు నాను ఇనికాదొ ఉండ్రీ నెగ్గికెజ్ కిదెజ్ ఇజి సుడొఁతిజు సెఇకదె కిజిన.

22 ఎందానిజ్ ఇహిజు దేవుణు రూలుజు వందిజ్ నాలొఇ గొప్పు సర్ల ఆజిన.

23 గాని మరి ఉండ్రీ సత్తు నా లొఇ ఏలుబడిః కినిక నాను సుడొఁజిన. నాను కిస ఇజి సుడొఁజిని దన్నిజ్ అయ సత్తు నావెట కార్లాడజినాద్. పాపం కిదెజ్ నా ఒడొఁల్లి బాగమ్క లొఇ మన్ని ఆసెజు అడిగి నజీ ఇడ్డెజ్ అయ సత్తు సుడొఁజి మంజినాద్. అందెజె గెలిస్తెజ్ అట్వండాజిన.

24 ఒబ, ఒబ దిన్నివందిజ్ మన్నుదు గొప్పు కర్ణమాతి మణిసి నాను. సావుదిజ్ తీర్పు వాతి యా ఒడొఁల్దాన్ నజీ డిఃబిస్సికాన్ ఎయెన్బా మంజినిక ఇహిజు బాగ మహాద్మరి.

25 మా ప్రబు ఆతి యేసు క్రీస్తు వెటనె మజీ అయ విడుఃదల వానాద్. దిన్ని వందిజ్ నాను దేవుణుదిజ్ వందనమ్కు వెహ్సిన. అహిజు దేవుణు సిత్తి రూలుజు లొజీదెజ్ సుడొఁజిన. గాని ఒడొఁల్ది సెఇ ఆసెజ్ కిదెజ్ ఆస ఆని నా మన్ను నజీ అడిజి దన్ని అడిగి నజీ ఇడ్డెనాద్. అందెజె నాను ఏలుబా పాపమ్దిజ్ వెటిపణి కినికాన్ లెకెండె.

8

దేవుణు ఆత్మ నడిఃపిసిని బత్కు

1 అందెజె ఏలు యేసుక్రీస్తు మున్ను నమకం ఇడ్డి దేవుణు ఎద్దు నీతినిజయ్కార్ ఆతివరిజ్ సిక్కు సిల్లెద్.

2 ఎందానిజ్ ఇహిజ, యేసుక్రిస్తుదాన్ వాతి కొత్త బత్తు. బత్తిదెజ్ దేవుణు వన్ని ఆత్మ మజి సిత్ర మనాన్. అయ ఆత్మ సత్తుదాన్ పాపం కిదెజ్ మన్ని ఆసదాన్ మాటు డిఁబె ఆత మనాల్. ఆహె సావుని సిక్స తపిసిని పాపం కిదెజ్ మన్ని ఆసెజాణిజ్ నాను డిఁబె ఆత మన్న.

3 మాటు ఒడొలది సెఇ ఆసెజాణిజ్ మహిజ్ పాపమ్దాన్ గెల్పిస్తెజ్ దేవుణు సిత్ర రూలుజ్ అట్వండ మహాద్. ఎందానిజ్ ఇహిజ, ఒడొలది సెఇ ఆసెజ్ అడ్డు కిత్తాద్. గాని దేవుణు మజి డిఁబిస్తాన్. ఎలాగ ఇహిజ, మా పాపమ్కాజ్ వందిజ్ వన్ని సొంత మరిసిజ్ యా లోకమ్దు పొక్తాండ్రె, ఒడొలది సెఇ ఆసెజ్ మా ముస్కు ఏలుబడిః కినిదన్నిదటాన్ మజి డిఁబిస్తాన్. వన్ని మరిసి మా లెకెండ్ ఒడొలదాన్ పుట్టాండ్రె మా పాపమ్కాజ్ పందిజ్ సాతాన్.

4 అందెజె ఏలు దేవుణు సత్తుదాన్ దేవుణు రూలుజు లోజిదెజ్ అట్నాట్. ఒడొలది సెఇ ఆసెజు లోజిదెజ్ అక్కర్ సిల్లెద్. ఏలు దేవుణు ఆత్మదిజ్ ఇస్టం ఆతి లెకెండ్ బత్తిదెజ్ అట్నాట్.

5 ఒడొలది సెఇ ఆసెజు లోజిజి బత్తినికార్ దన్ని వందిజె ఎత్తు కిజి మంజినార్. గాని దేవుణు ఆత్మదిజ్ లోజిజి నడిఃనికార్ దేవుణు ఆత్మదిజ్ తగిత్తికెజ్ ఒడొబినార్.

6 పాపం కిదెజ్ ఒడొల్లు మన్ని సెఇ ఆసెజు ఏలుబడిః కిని మన్ను మన్నికార్ దేవుణుబాణిజ్ దూరం ఆనారె సానార్. గాని దేవుణు ఆత్మదిజ్ ఇస్టం ఆతిలెకెండ్ బత్తినికార్ దేవుణువెట బత్తినార్ వరిలోఁగ సాంతి సమదనం మంజినాద్.

7 ఒడొలది సెఇ ఆసెజ్ ఏలుబడిః కిని మన్ను మన్నికార్ దేవుణువెట కుట్ట మన్నికార్. వారు దేవుణు రూలుజు లోజిఇకార్. లోజిదెజ్ అట్వర్.

8 అందెజె ఒడొలది సెఇ ఆసెజ్ ఏలుబడిః కిని మన్ను మన్నికార్ దేవుణుదిజ్ ఇస్టం ఆతివజు నడిఃదెజ్ అట్వర్.

9 దేవుణు ఆత్మ మీ లోఁగ మహిజు అయ ఆత్మదిజ్ లోజిజి మండ్రెజ్ అట్పిదెర్. ఒడొలది సెఇ ఆసెజ్ వందిజ్ లోజిజి మండ్రెజ్ ఎత్తు కిని

మన్సుదిజ్ లోజిజి మండ్రెజ్ అక్కర్ సిల్లెద్. క్రీస్తుబాణిజ్ వాజిని ఆత్మ సిల్లికాన్, క్రీస్తుజ్ సెందితికాన్ ఆవన్.

10 గాని మీ లోఇ క్రీస్తుబాణిజ్ వాజిని ఆత్మ మహిజ మీ ఒడోల్ పాపమ్దాన్ సానాద్ గాని మీ ఆత్మ బత్కినాద్. ఎందానిజ్ ఇహిజ దేవుణు మీ పాపమ్కు విజు మాయిష్టాండ్రె నీతి మన్నికార్ ఇజి ఇడ్డ మనాన్.

11 సాతివరిబాణిజ్ యేసుజ్ మరి బత్కిస్తి దేవుణు ఆత్మ మీలోఇ బత్కజిమహిజ, సాతివరిబాణిజ్ క్రీస్తుజ్ మరి బత్కిస్తి దేవుణు సాజిసాని మీ ఒడోల్దిజ్బా బత్కిస్సాన్. మీలోఇ మన్ని దేవుణు ఆత్మదాన్ యాక కినాన్.

12 అందెజె తందెరిజాండె, మాటు ఉండ్రీ దన్నిజ్ లోజిజి మండ్రెజ్ బాజిత మన్నికాట్ గాని అక్క ఒడోల్ది సెఇ ఆసెజ్ లోజినిక ఆవద్.

13 ఎందానిజ్ ఇహిజ, మీ ఒడోల్ది సెఇ ఆసెజాణిజ్ ఏలుబడిః కిబె ఆని మన్సు వెష్టాలెకెండ్ నడిఃతిజ మీరు సాస సానార్. గాని దేవుణు ఆత్మదాన్ మీ మన్సుదు మన్ని సెఇ ఆసెజ లాగ్గిపొక్కిజ ఎలాకాలం బత్కినిదెర్.

14 దేవుణు ఆత్మ నడిఃపిసిని వజ నడిఃనికార్ దేవుణు కొడోఃరె.

15 ఎందానిజ్ ఇహిజ, దేవుణు మజి సత్తి ఆత్మ మజి తియెల్ తపిసి వెటి పణిమణిసిర్ తెకెండ్ ముందాల్ మహివజ సిక్చ వానాద్ ఇజి తియెలాజి మండ్రెజ్ ఇడ్వన్. గాని మజి దేవుణు కొడోఃర్ ఇజి ఇడ్డ మనాన్. అందెజ మాటు ఏలు దేవుణుదిజ్ అబ్బ ఇజి కూక్కెజ్ ఆనాద్.

16 మాటు దేవుణు కొడోఃర్నె ఇజి దేవుణు ఆత్మ మా ఆత్మవెట కూడిఃతాండ్రె నిజం వెప్పినాన్ ఇజి మాటు నెసినాట్.

17 మాటు దేవుణు కొడోఃర్ కాక దేవుణు వన్ని కొడోఃరిజ్ ఇడ్డిమన్ని ఆస్తిదిజ్ అక్క మజి వానాద్. దేవుణు క్రీస్తుజ్ ఇడ్డిమన్ని అక్కజ్బా క్రీస్తువెట మజి దోహ్కె. ఎలాగ ఇహిజ మాటు క్రీస్తువెట వన్ని గొప్ప గవరం దోహ్కెజ్ ఇహిజ వన్నివెట కన్ఘమ్కుబా బరిస్తెజ్వలె.

వాని కాలమ్దు తోర్ని సొకు

18 యా కాలమ్దు మజి వాని కస్టమ్కు సుడతిజ అక్కెజ్ ఏపటిదిక్కెజ్ ఆఉ ఇజి నాను ఒడఃబిజిన. గాని వాని కాలమ్దు దేవుణు మజి తోరిసిని సోకు దిన్నిజ్ ఇంక ఎస్సా గొప్ప పెరిక.

19 దేవుణు కొడోర్ ఎయెర్ ఇజి దేవుణు తోరిస్సి కాలం వందిజ్ దేవుణు తయార్ కిత్తికెజ్ విజు ఆసదాన్ ఎద్దుసుడఃజి మంజినె.

20 ఎందానిజ్ ఇహిజ దేవుణు తయార్ కిత్తికెజ్ విజు పణిదిజ్ రెవండ సిక్స సీజి ఇడ్డాన్. ఎలాగ ఇహిజ అక్కెజ్ కిత్తిక ఆవద్. ఉండ్రి దన్ని వందిజ్ వారు ఎద్దుసుడఃజి మండ్రెజ్ ఇజి దేవుణునె అక్కు జర్పిస్తాన్.

21 ఇనిక ఎద్దుసుడఃజి మంజినె ఇహిజ, దేవుణు తయార్ కిత్తికెజ్ విజు ఏలు పాడాఃజి సాని దన్నిజ్ అడిగి ఆతె మన్నె గాని దన్నిబాణిజ్ని దేవుణు డిఃబిస్సి దన్నిజ్ ఎద్దుసుడఃజి మంజినె. వన్ని కొడోరిజ్ తగితి లెకెండ్ గొప్ప జాయ్ కల్గితి మన్ని విడుఃదల సీనాన్ ఇజి ఎద్దుసుడఃజినె.

22 ఏలుదాక, ఏరుఈబాని ఆయ్లికొడోః నొప్పిదాన్ అడఃబానిలెకెండ్, దేవుణు తయార్ కిత్తికెజ్ విజు ఉండ్రెలెకెండ్ మొరొ ఆజి మంజినె.

23 దేవుణు తయార్ కిత్తికెజ్ విజునె ఆఉ, దేవుణు ఆత్మ దొహ్కొక్తి మాటుబా అడఃబాజి మంజినాట్. మా లొఇ మన్ని దేవుణు ఆత్మ ఇహిజ తొలిత దొహ్కొక్తి ఉండ్రి ఇనాయం లెకెండ్. వెనుక వాని పూర్తి ఇనాయమ్దిజ్, ఇహిజ దేవుణు వన్ని కొడోరిజ్ ఇడ్డిమన్ని గొప్ప అక్కువందిజ్ మాటు ఎద్దుసుడఃజి మంజినాట్. నస్తివలె మా ఒడోఃలే కస్టమ్దాన్ డిఃబె ఆనాడ్లె.

24 దేవుణు మజి రక్సిస్తిబాణిజ్ అసి మాటు మజి వాని జాయ్ కల్గితిమన్ని విడుఃదలవందిజ్ ఎద్దు సుడఃజి మంజినాట్. ఎద్దుసుడఃజి మంజనిక సుడఃతాన్ ఇహిజ ఒరెన్ దన్నివందిజ్ ఎద్దుసుడఃజి మండ్రెజ్ ఆక్కర్ సిల్లెద్గదె. ఎందానిజ్ ఇహిజ సుడఃతి వెనుక దన్నివందిజ్ మరి ఎద్దుసుడఃజి మన్విన్గదె.

25 గాని మాటు సుడఃఇ దన్నివందిజ్ ఎద్దుసుడఃజి మహిజ్,

దన్నివందిజ్ ఓరిసి మంజినాట్.

26 అయావజనె మా లొఱమన్ని ఆత్మ వందితిమన్నివలె దేవుణుఆత్మ మజి సత్తు సీజినాన్. ఎలాగ పార్దనం కిదెజ్ ఇజి నెన్ ఏండ మాటెజాణిజ్ వెహైజ్ అట్ ఇనన్ని గుపె ఆనివలె దేవుణు ఆత్మనె మా వందిజ్ పార్దనం కిజినాన్.

27 మా మన్సుదు ఇనిక ఇజి దేవుణు సూణాండ్రె, దేవుణు ఆత్మ వెప్పిక అర్దం కిజినాన్. అక్క ఇనిక ఇహిజ దేవుణు ఆత్మ దేవుణు వెట ఎలాగ పార్దనం కిదెజ్ ఇజి దేవుణు ఆస ఆజినాండ్రొ అయావజ దేవుణు ఆత్మ వరివందిజ్ పార్దనం కిజినాన్.

విజువనకాజ్ మున్సు గొప్పజ గెలిస్సాట్

28 దేవుణుదిజ్ ప్రేమిసినివరిజ్ వాండ్రు ఏర్పాటు కిత్తిదన్నిజ్ ఎర్లిస్తివరిజ్, విజు నెగెండ్ జర్పిసినాన్ ఇజి మాటు నెసినాట్.

29 దేవుణు ముందాల్ నె వన్నిజ్ నమ్మిని వరిజ్ నెస్తాండ్రె వరిజ్ ఎర్లిస్తాన్. వన్ని మరిసిలెకెండ్ ఆనార్ ఇజి దేవుణు వరిజ్ కేట ఇడ్డాన్. ఆహా కిత్తిజ్ క్రిస్తు దేవుణుదిజ్ పెరిమరిసి లెకెండ్ ఆనాన్. దేవుణు కొడొఱాతి మాటు యేసుజ్ తంబెరుజు లెకెండ్ ఆనాట్.

30 ఎయెర్ దేవుణుదిజ్ నమ్మినార్ ఇజి దేవుణు ముందాల్ నె నెస్తాన్. వరిజ్ దేవుణు కూక్తాన్. దేవుణు కూక్తిజ్ వన్నిడగు సాహివరిజ్ వరి పాపమకు విజు నెమిస్తాండ్రె దేవుణు వెట కూడిఱికార్ ఇజి ఇడ్డాన్. కూడుఱి వరిజ్ వన్ని గొప్ప జాయ్ సిత్తాన్.

దేవుణు ప్రేమ

31 ఏలు దన్నివందిజ్ మాటు ఇనిక వెహ్సాట్. దేవుణు మా దరిజ్ మహిజ మా ఎర్దు ఎయెర్ బా నిల్ ఏర్ ఇజినె వెహైజ్.

32 దేవుణు వన్ని సొంత మరిసిజ్ సి ఏండ ఆవతాన్. గాని గొప్ప కర్ణమాతి సావుదిజ్ ఒపజెప్తాన్. క్రిస్తుజ్ మజి సిత్తి దేవుణు, మాటు వన్ని వందిజ్ బత్తిదెజ్ మజి కావాలిస్తికెజ్ విజు సి ఏండ్రా? నిజం సీనాన్.

33 దేవుణు ఎర్లిస్తివరి ముస్కు తప్పుజ్ మొప్పి వరి ముస్కు గెలిస్తెజ్ ఎయెర్బా అట్ఎర్. ఎందానిజ్ ఇహిజు, దేవుణునె మా పాపమ్కు సెమిసి మజి వన్ని వెట కూడుఃప్త మనాన్.

34 మజి సిక్స సీదెజ్ ఇజి ఎయెన్బా తీర్పు తీరిస్తెజ్ ఆట్ఎన్. మజి సిక్స సీదెజ్ ఇజి యేసు తీర్పు సీనాండ్రా? సిల్లెన్. ఎందానిజ్ ఇహిజు, మా వందిజ్ సాతి యేసుజ్ దేవుణు వన్ని ఉణెర్ పడఃకాదు బసయి కితాండ్రె గొప్ప గవరం సిత్తాన్. ఏలు క్రీస్తునె మా వందిజ్ దేవుణుబాన్ బతిమాల్లినాన్

35 క్రీస్తుజ్ మా ముస్కు మన్ని ప్రేమదిజ్ అడ్డు కిదెజ్ ఇనిదన్నిజ్బా అట్ఎద్. స్రమెజ్ వాతిజ్బా గాని, కస్టమ్కు వాతిజ్బా గాని, మాలెజ్ వాతిజ్బా గాని, కరు వాతిజ్బా గాని, పొర్పాదెజ్ సొక్కెజ్ సిలితిజ్బా గాని, ఇని ప్రమాదమ్కు వాతిజ్బా గాని, మజి సప్తిజ్బా గాని క్రీస్తు ప్రేమ ఎసెజ్బా డిస్ఎండ మంజినాద్.

36 యాకెజ్ విజు దావీదు రాజు రాస్తి లెకెండ మన్నె. “మాపు మీ లోకుర్ ఆతాప్ కాక ఆఇకార్ ఎసెజ్బా మజి సప్తెజ్ ఇజి సుడఃజినార్. గొరెజ్ కత్తికార్ వనకాజ్ కొయ్దెజ్ సుడఃనిలెకెండ మజి సప్తెజ్ సుడఃజినార్☆”.

37 యాకెజ్ విజు జర్గితిజ్బా మాటు క్రీస్తు ప్రేమదాన్ విజు వనకాజ్ ముస్కు గొప్పజు గెలిసినాట్.

38-39 యాక నాను గటిజు నమ్మిజిన. ఇనిక ఇహిజు, సావు ఆతిజ్బా గాని, బత్తు ఆతిజ్బా గాని, దేవుణు దూతార్ ఆతిజ్బా గాని, దెయమ్కు సత్తుజ్ ఆతిజ్బా గాని, ఏలు జర్గినికెజ్ ఆతిజ్బా గాని, వాని కాలమ్దు జర్గినికెజ్ ఆతిజ్బా గాని, ఏలుబడిః కినికార్ ఆతిజ్బా గాని, పెరి ఎత్తుదు మన్నికెజ్ ఆతిజ్బా గాని, పెరి జోరెదు మన్నికెజ్ ఆతిజ్బా గాని, మరి ఇనికబా గాని దేవుణుదిజ్ మా ముస్కు మన్ని ప్రేమదిజ్ అడ్డు కిదెజ్ వనకాజ్ అట్ఉ మా ప్రబు ఆతి యేసుక్రీస్తు మా వందిజ్ కిత్తి గొప్ప పెరి పణిజాణిజ్ దేవుణు వన్ని ప్రేమ తోరిస్తాన్.

☆ 8:36 8:36 కీర్తన 44:22.

9

యూదురు వందిజ్ పవులు విసారిసినాన్

1-2 ఏలు నాను ఉండ్రీ వెహ్వా, అక్క నిజమ్నె. అబద్దం ఆవద్. నాను వెహ్విక నిజమె ఇజి క్రీస్తు నెసినాన్. నాను వెహ్విక అబద్దం ఆవద్. నా సొంత జాతి ఆతి యూదురు వందిజ్ నా మన్నుదు గొప్ప బాద ఆజిన. డిన్ ఏండ దుకం ఆజిన. నాను వెహ్విక నిజమ్నె ఇజి నా మన్నుని దేవుణు ఆత్మ సాసి వెహ్సినార్.

3 నా సొంత జాతి ఆతి యూదురు, క్రీస్తుజ్ నమ్మిదెజ్ ఇజి నాను ఆస ఆజిన. అక్క జర్గిదెజ్ దేవుణు బాణిజ్ నా మున్ను నయివ్ వాతిజ్ బా, క్రీస్తుబాణిజ్ నజి ఎర్గిస్తిజ్ బా పరవ సిల్లెద్ ఇజి ఒడెబిజిన.

4 వారు ఇస్రాయేలుదికార్, వన్ని సొంత లోకుర్ ఇజి దేవుణు ఇడ్డికార్. దేవుణు వన్ని గొప్ప గుణమ్ దాన్ ఎయెర్ సిల్లి బాడ్డిదు నడిపిస్తికార్. దేవుణు వరి వెటనె ఒప్పుమానమ్ కు కిత్తాన్. దేవుణుదిజ్ ఎలాగ మాడిస్టెజ్ ఇజి వరిజె వెహ్వాన్. వరిజె దేవుణు సీన ఇజి ఒప్పుమానమ్ కు కిత్త మనాన్.

5 వరి అనిగొగారు ఆతి అబ్రహాం, ఇస్సాకు, యాకోబు ఇనికార్ ఇస్రాయేలు లోకుర్ లొఇ గొప్ప పేరు పొందితికార్. దేవుణు పొక్కు ఇజి ఒప్పుమానమ్ కు కిత్తి రాజు యా యూదు జాతిలోఇనె లోకు వజ పుట్టాన్. విజేరిమున్ను ఏలుబడిః కిని దేవుణు ఎసెజ్ బా పొగిడెః ఆజి మనీన్.

6 అహిజ, దేవుణు ఇస్రాయేలు లోకురిజ్ వెహ్వికెజ్ జర్గివెత్తాద్ ఇజి ఇండ్రెజ్ ఆవద్. ఎందానిజ్ ఇహిజ, ఇస్రాయేలు లోకుర్ ఇజి వెహ్ ఆనికార్ విజేరి దేవుణుదిజ్ సరియాతి సొంత లోకుర్ ఆవద్.

7 అబ్రాహాం పొటాదికార్ విజేరి వన్ని తెగాదు పుట్టికార్ ఇజి దేవుణు ఇడ్ ఏన్. ఎందానిజ్ ఇహిజ “నీ కొణెః ఆతి ఇస్సాకువెలెహాన్ వానికారె నీ జాతి ఆనార్☆”, ఇజి దేవుణు అబ్రహాం వెట వెహ్ మనాన్.

8 ఎలాగ ఇహిజ, అబ్రహాం తెగాదు పుట్టికార్ విజేరి దేవుణు కొణెః ఆవద్. గాని దేవుణు అబ్రహాముజ్ సెత్తి ఒప్పుమానం నమ్మితిజ్

☆ 9:7 9:7 ఆది 21:12.

దేవుణు కొడోకొర్ అబ్రాహముజ్ సరియాతి తెగాదికార్ ఇజి దేవుణు ఇడ్నాన్.

9 దేవుణు అబ్రహాం వెట కిత్తి ఒపుమానం ఇక్కాదె. “కాలెహిజ్ యా సమయమ్దు నాను వాన. నస్తివలె నీ అల్పి ఒరెన్ కొడోకొ ఇడ్నాద్లె”✠.

10 అక్కాదె ఆవద్, రిబెక పొటాదివరిజ్ ఒరెండ్రె అప్పొసి, ఎయెస్ ఇహిజు మా అనిగొగొ ఆతి ఇస్సాకు.

11-13 ఇస్సాకు అల్పి రిబెక పాత డి:స్తి మహివలె, దేవుణు దన్నివెట వెప్తాన్. జవ్ల మరిసిర్ పుట్వండ మహివలెనె, వారు తప్పు గాని నెగ్గిక గాని కివండ మహివలెనె దేవుణు దన్నిజ్ వెప్తాన్, “పెరికాన్ ఇజిరి వన్నిజ్ అడిగి మంజినాన్లె”, ✠ ఇజి దేవుణు యాక వెప్తా నండో పంటెజ్ వెనుక ఒరెన్ దేవుణు ప్రవక్త దేవుణు వెప్తా మాట వెప్తాన్. “యాకోబుజ్ నాను ప్రేమినిన, ఏసావు నజి పడి:ఇకాన్”✠. ఇజి. ఎందానిజ్ ఇహిజు, వన్ని లోకుర్ వందిజ్ దేవుణుదిజ్ ఉండ్రె ఉదెసం మహాద్. అయాలెకెండ వాండ్రు నడ్:పిస్సాన్. లోకుర్ కిని పణిజాణిజ్ ఆవద్. దేవుణు ఏర్పాటుదానె విజు జర్గిజినె. దేవుణు ఏర్పాటు కినికెజ్ లోకుర్ ఒడ్:బినిలెకెండ్రె ఆవద్.

14 అహిజు, దేవుణు కొడోకొర్ ఎయెర్ ఇజి దేవుణు ఏర్పాటు కిత్తిదన్ని లొఇ దేవుణు తేడ సూణికాన్ ఇజి ఒడ్:బినిదెర్సు. సిల్లె, దేవుణు అనెయం కినికాన్ ఆవన్.

15 ఎలాగ ఇహిజు, దేవుణు మోసెవెట ఈహు వెప్తాన్. “ఎయెస్ ముస్సు దయ తోరిస్సెజ్ నాను ఇస్టం ఆజినానొ వన్నిముస్సు దయ తోరిస్సు. ఎయెస్ ముస్సు కనికారమాదెజ్ ఇజి ఇస్టం ఆజినానొ వన్ని ముస్సు కనికారం ఆజిన”✠.

16 అందెజె, యాక లోకు ఆసదానె గాని వన్నిపణిజాణిజ్ గాని దొహ్కొక ఆవద్. దేవుణు దయదానె యాక జర్గిజినాద్.

17 దేవుణు మాటదు ఈహు మనాద్. దేవుణు పరోరాజు వెట ఇనిక వెప్తాన్ ఇహిజు, నాను ఎస్సానొ సత్తు మన్నికాన్ ఇజి నీ వెలెహాన్

✠ 9:9 9:9 ఆది 18:10,14. ✠ 9:11-13 9:11-13 ఆది 25:23. ✠ 9:11-13 9:11-13 మలా 1:2,3. ✠ 9:15 9:15 నిర్గమ 33:19.

విజుబాణి లోకుర్ వెండ్రెజ్ నె నిజి రాజువజ ఇడ్డ మన్ను”[☆] ఇజి.

18 అహిజ ఎయెన్ ముస్సు దయ తోరిస్తెజ్ దేవుణు ఇస్టం ఆనాండ్రో వన్ని ముస్సు దయ తోరిస్తాన్. ఎయె ముస్సు గర్ర కిబిస్తెజ్ ఇస్టం ఆనాండ్రో వన్ని ముస్సు గర్ర కిబిస్తాన్.

దేవుణు విజు జర్పిసినాన్

19 ఏలు మీరు మరి వెహ్పిదెర్పు. దేవుణు ఇస్టమ్దిజ్ ఎయెన్బా ఎద్రిస్తెజ్ అట్ ఏన్ గదె. మరి దేవుణు ఇస్టం వజ లోకుర్ కిదెజ్ ఇజి విజు జర్పిస్సివలె, తప్పు కిత్తార్ ఇజి లోకుర్ వందిజ్ దేవుణు ఎలాగ వెహ్పాజానాన్?

20 గాని దేవుణు ఎద్రు వర్గిదెజ్ లోకు నీను ఎయి?. “తయార్ కిత్తి వన్నివెట, తయార్ కిబె ఆతికెజ్ ఎందానిజ్ నజి ఈహు తయార్ కిత్తి ఇజి వెన్ బాదెజ్ ఆనాదా?

21 కుండెజ్ తయార్ కినివన్నిజ్ ఉండ్రె ముదదాన్ రుండి రకమ్ది కుండెజ్ తయార్ కిదెజ్ అక్కు మనాద్ గదె?. ఉండ్రె కుండ లోకుర్ సుండేజి ఇక్క ఎస్సొ నెగ్గిక ఇజి వహ్పివందిజె మరి ఉండ్రె కుండ మాముల్ పణిదిజ్ ఇడ్డి వందిజ్.

22 దేవుణుదిజ్ బా లోకుర్ వెట ఇస్టమాతి వజ కిదెజ్ అక్కు మనాద్. పాపం కిని వరి వెట వన్ని నండొ కోపమ్ దాన్ వాని గొప్ప సత్తు తోరిస్తెజ్ ఆస్ ఆజినాన్. గాని వరివెట దేవుణు వెటనె కోపం ఆవీండ మహిజ, నాసనం వందిజ్ ఇడె ఆతి మన్ని వరి వెట కోపం ఆవీండ ఓర్పుదాన్ మంజినాన్.

23 ఎందానిజ్ ఇహిజ, వన్ని గొప్ప దయ దొహ్ క్తి మజి, వన్ని గొప్ప జాయ్ వందిజ్ తయార్ కిత్తివరిజ్ దేవుణు వన్ని గొప్ప జాయ్ తోరిస్తెజ్ ఆహె కిత్తాన్ ఇహిజ మాటు ఇనిక వెహ్పాట్?

24 ఏర్పాటు కిబె ఆతి మాటు ఎయెర్ ఇహిజ, యూదురిని యూదురు ఆఇజాతికార్ బా.

25 యూదురు ఆఇ జాతిదివరిజ్ ఎర్లిసినివందిజ్ హుసెయ ప్రవక్త వెట దేవుణు ఈహు వెహ్పాన్. “నా లోకు ఆఇ వరిజ్ ఏలు నా లోకుర్

☆ 9:17 9:17 నిర్లమ 9:16.

ఇజి కూక్కు. నాను ముందాల ప్రేమ తోరిన్ ఇ వరిజ్ నాను ప్రేమిసినికార్ ఇజి కూక్కు*”.

26 దేవుణు ఆ ఇ జాతిదివరి వందిజ్ వెహ్తి మాటెజ్ హుసెయ మరి వెహ్తాన్. “మీరు మా లోకుర్ ఆ ఇదెర్ ఇజి నాను వెహ్తిబాన్, బత్తిని దేవుణు కొణొర్ ఇజి మీరు పేరు ఇడె ఆనిదెర్”*

27 యెసయ ప్రవక్త ఇస్రాయేలు లోకుర్ వందిజ్ ఇనిక వెహ్తాన్ ఇహిజు, “ఇస్రాయేలు సమ్దరం ఒడ్డుదు మన్ని ఇన్కు లెకెండె, లెక్క కిదెజ్ అట్ ఇ నస్సా లోకుర్ అతిజ్ బా, వరిలో ఇ ఉండ్రీ ఇజి గుంపుదిజ్ నె దేవుణు రక్సిస్సాన్.

28 ఎందానిజ్ ఇహిజు దేవుణు ఆల్పయం ఆవిండె యా లోకం మున్కు తీర్పు కినాండె వన్ని పణి వెటనె పూర్తి కినాన్ లె*”,

29 దేవుణు కనికారం తోరిన్ ఇజ్ ఎయెన్ బా సిక్చదాన్ తప్రె ఆవిన్. యెసయ ప్రవక్త ముందాల్ వెహ్తి లెకెండె, “విజు దన్నిజ్ అతికారం మన్ని దేవుణు మా కొణొకొరెజ్ ఇడెవిండె పూర్తి సప్తాన్ ఇహిజు, మాటుబా సొదోము గొమొర పట్టుమది వరిలెకెండె పూర్తి పాడాత మహాట్ సు*”. దేవుణు అయ పట్టుమదు మహివరిజ్ పూర్తి విజేరిజ్ సప్తాన్.

యూదురు గెలిస్తెజ్ అట్ విండె ఆజినార్

30 అహిజు, ఏలు ఇనిక వెహ్తెజ్? దేవుణు వరిజ్ నీతినిజయ్ మన్నికార్ ఇజి ఇడ్డెజ్ యూదురు ఆ ఇకార్ సుడెవతార్ గాని దేవుణు వరిజ్ నీతినిజయ్ మన్నికార్ ఇజి ఇడ్డాన్. క్రిస్తు మున్కు నమకం ఇడ్డిజ్ నీతినిజయ్ మన్నికార్ ఇజి ఇడ్డాన్.

31 గాని ఇస్రాయేలు లోకుర్ ఇహిజు దేవుణు మోసెజ్ సిత్తి రూలుజ్ లోజితిజు నీతి మన్నికార్ ఆనార్ ఇజి నండె సుడెవతార్ గాని అట్ విండె ఆత్తార్.

32 ఎందానిజ్ ఇహిజు వారు దేవుణు మున్కు నమకం ఇడెవతార్. గాని వరి పనిజాణిజ్ నీతినిజయ్ కార్ ఆనార్ ఇజి నంబ సుడెవతార్.

* 9:25 9:25 హోసెయ 2:23. * 9:26 9:26 హోసెయ 1:10. * 9:28 9:28 యెసయ 10:22,23. * 9:29 9:29 యెసయ 1:9.

అందెజె దేవుణు క్రిస్తు ఇజి ఎర్లిసి వన్ని ముస్కు అడ్డు ఆతి పణుకు ముస్కు అర్నిలెకెండ్ వారు తొరో ఒడిజి అర్తార.

33 యాక ప్రవక్త రాస్తి లెకెండ్ మనాద్. “నుడేదు, నాను సియెన్దు ఉండ్రి పణకు నిల్ప్పిన. అక్క అడ్డు ఆనాదె లోకాజ్ తొరో ఒడిజి అర్ప్పాద్. గాని వన్ని ముస్కు నమకం ఇడ్డికాన్ సిగు ఆవన్☆.”

10

1 తంబెరిజాండె, నా సొంత జాతి అతి యూదురిజ్ దేవుణు రక్సిన్తెజ్ ఇజి నాను గొప్ప ఆస ఆజి పార్దనం కిజిన.

2 వారు దేవుణు వందిజ్ గొప్ప ఉసార్దాన్ మన్నికార్ గాని దేవుణుదిజ్ పూర్తి నెన్వేర్ ఇజి వరివందిజ్ నాను వెప్పిన.

3 ఎందానిజ్ ఇహిజు, దేవుణు లోకురిజ్ ఎలాగ నీతినిజయ్కార్ ఇజి ఇడ్నాన్ ఇజి వారు అర్దం కివేర్. నీతినిజయ్కార్ ఇజి దేవుణు ఇడ్డివందిజ్ లోకు ఎలాగ నడిదెజ్ ఇజి దేవుణు తొరిస్తి సర్దు నడివిండ నీతినిజయ్కార్ ఆదెజ్ ఇజి వారు వరి సొంత రూలుజ్ ఇడ్తార.

4 క్రిస్తు వాతిజ్ ఏలు దేవుణు మోసెజ్ సిత్తి రూలుజ్ లోకాజ్ దేవుణుబాన్ కూడుఃవేద్. క్రిస్తుముస్కు నమకం ఇడ్డికార్ విజేరిజ్ దేవుణు వన్నిబాన్ కూడుఃప్పాన్.

విజేరి వందిజ్ ఉండ్రి కొత సరి

5 దేవుణు మోసెజ్ సిత్తి రూలుజాణిజ్ నీతినిజయ్కార్ మన్నికాన్ ఆదెజ్ సుడేజిని వన్ని వందిజ్ మోసెబా రాస్త మనాన్. ఇనిక ఇహిజు “రూలుజు వజ నడిదెజ్ ఆస ఆనికాన్ వనకదటాన్ బత్తిదెజ్వలె☆”

6 గాని నమకం ఇడ్డివందిజ్ నీతినిజయ్కార్ మన్నికార్ ఇజి దేవుణు ఇడ్డిదన్ని వందిజ్ మన్ని మాటాదు మాటు ఇని ఇనికెజ్ ఆవేద్ ఇజి వెప్తా మనాద్. ఇనికెజ్ ఇహిజు “రక్కుణ దోహ్కాద్ ఇజి పరలోకమేదు

ఎక్స్ క్రీస్తుజ్ అడిగి తత్తెజ్ ఎయెన్ సొనాన్ ఇజి మీ మన్సుదు వెహైజ్ ఆవద్”.

7 అయాలెకెండే సాతివరిబాన్ అయాలోకమ్దు సొన్ని క్రీస్తుజ్ బాణిజ్ తత్తెజ్ ఎయెన్ సొనాన్ ఇజి మీ మన్సుదు వెహైజ్ ఆవద్.

8 గాని అయ మాట ఇనిక వెహ్సినాద్? ఇనిక వెహ్సినాద్ ఇహిజ, “దేవుణు మాట డగ్రునె మనాద్. అయ మాటెజ్ మీ వెయుదునె మన్సె వెహైజ్ ఆనిదెర్. మీ మన్సుదు మన్సె ఒడ్కుబిదెజ్ ఆనిదెర్” ✱ మాటు సాటిసిని యా మాట క్రీస్తు మున్సు నమకం ఇడ్డు ఇజినె.

9 అయ మాట ఇనిక ఇహిజ, యేసునె ప్రబు ఇజి ఎయెన్బా లోకుర్ ముందాల వెహైజ, అక్కాదె ఆవద్, యేసుజ్ సాతివరిబాణిజ్ దేవుణు నిక్తాన్ ఇజి ఎయెన్బా వన్ని గర్బమ్దు నమ్మిత్తిజ దేవుణు వన్నిజ్ రక్సిస్సాన్.

10 ఇనిక ఇహిజ, మీ మన్సుదు నమ్మిత్తిజ దేవును మిజి వన్నిబాన్ కూడుఃప్పాన్. అక్కాదె ఆవద్, యేసు నీ ప్రబు ఇజి లోకుర్ ముందాల వెహైజ దేవుణు నిజి రక్సిస్సాన్లె.

11 దేవుణు మాటదు ఇనిక రాస్త మనాద్ ఇహిజ, క్రీస్తు మున్సు నమకం ఇడ్కికాన్ ఎయెన్బా సిగు ఆవన్.

12 యూదురుజ్ గాని ఆఇజాతిది వరిజ్ గాని దేవుణు ఉండ్రెలెకెండే సూణాన్. వాండ్రు ఒరెండ్రె విజేరిజ్ ప్రబు ఆతిజ్, వన్నిజ్ లొస్సివరిజ్ విజేరిజ్ వాండ్రు నండొ దీవిస్సాన్.

13 యాక ఒరెన్ ప్రవక్త వెహైలెకెండే, “నజి రక్సిన్అ ఇజి దేవుణు వెట వెహ్సెవరిజ్ విజేరిజ్ దేవుణు రక్సిస్సాన్” ✱.

14 గాని యూదురు వందిజ్ సెగొండార్ వెహ్సినార్సు. క్రీస్తుమున్సు నమకం సిల్లిజ “నజి రక్సిన్అ”, ఇజి క్రీస్తు వెట ఎలాగ ఇనార్? క్రీస్తువందిజ్ వెండ్రెజ్ ఇహిజ వెన్ఇకార్ ఎలాగ వన్నిజ్ నమ్మినార్? ఎయెరిజ్బా క్రీస్తువందిజ్ నెస్పిన్ఏండ మహిజ వారు ఎలాగ వెనార్?

15 ఎయెరిజ్బా దేవుణు షోక్ఏండ మహిజ సాటిస్సికార్ ఎలాగ

సొనార్. దన్నివందిజె దేవుణు మాటాదు ఈహు రాస్త మనాద్. “దేవుణు సువార్త వెప్తాజ్ సొన్నినిక ఎస్సొ గొప్ప నెగ్గిక”☆.

16 దన్నిజ్ నాను వెప్సొన. క్రీస్తువందిజ్ వెప్తాజ్ దేవుణు లోకాజ్ పోక్తాన్ గాని విజేరె సువార్తదిజ్ లొజివితార్. దిన్నివందిజ్ యెసయ ప్రవక్త ఇనిక వెప్తాన్ ఇహిజ, “ప్రబు, మాపు వెప్తొ మాటెజ్ ఎయెర్బా వెన్వితార్☆”, ఇజి.

17 అహిజ క్రీస్తువందిజ్ విప్తిజానె నమకం ఇడ్నార్. ఎయెర్బా సువార్త సాటిస్తిజానె క్రీస్తు వందిజ్ వెండ్రెజ్ ఆనాద్.

18 గాని నాను వెన్బాజిన, “యూదురు సువార్త వెన్వరా?”, “నిజమె వెహార్”, ఇజి వెహ్న. కీర్తనదు రాస్తొ మన్ని తెకెండ, దేవుణు వందిజ్ వారు వెప్తిక లోకమ్దు విజు బాడ్డిజ మన్నికార్ వెహార్. అందిదెజ్ అట్ఇ బాడ్డిదుబా దేవుణు వందిజ్ మాటెజ్ అందితె మన్నె☆.

19 మరి ఉండ్రీ ప్రన్న వెన్బాన, “సువార్త వందిజ్ యూదురు అర్దం కితారా? సెగొండార్ అర్దం కితార్ గదె. దేవుణు ఇస్రాయేలు లోకాజ్ దిన్నివందిజ్ వెప్తిక మోసె వెప్తాన్, “యూదురు అఇజాతిది వరివెట మిజి గోస కిబిస్సాలె. అర్దం కిదెజ్ అట్ఇ వరిజ్ నాను దీవిస్సాలె”☆

20 యెసయ ప్రవక్తబా దిన్నివందిజ్ గటిజ రాస్తొ మనాన్, “నజి రెబాఇవరిజ్ నాను దోహ్కళ్ళ. నజి వెన్బాఇవరిజ్ నాను తోరె ఆన”☆.

21 గాని ఇస్రాయేలు లోకుర్ వందిజ్ దేవుణు ఇనిక వెప్తాన్ ఇజి యెసయ రాస్తాన్, “నా మాటదిజ్ లొజివిండ నా వెట ఎద్రిసిని లోకు వందిజ్, వారు మర్జి వానిదాక నాను ఎద్రుసుండెజి మంజిన”☆.

11

యూదురిజ్ దేవుణు దయ తోరిస్సాన్.

☆ 10:15 10:15 యెసయ 52:7. ☆ 10:16 10:16 యెసయ 53:1. ☆ 10:18 10:18 కీర్తన 19:4. ☆ 10:19 10:19 ద్వితీ 32:21. ☆ 10:20 10:20 యెసయ 65:1. ☆ 10:21 10:21 యెసయ 65:2.

1 అహిజ నాను వెన్బాజిన, దేవుణు వన్ని సొంత లోకుర్ ఆతి యూదురిజ్ డిస్త సిత్తాండ్రా? సిల్లెన్, ఎస్సెజ్బా డిన్ఎన్. ఎలాగ ఇహిజ నానుబా యూదువాండ్రునె. అబ్రహాం తెగాదు పుట్టి బెన్యామిను కులమ్దు పుట్ట మన్న. గాని దేవుణు నజీ డిన్ఎత్తాన్.

2 సిల్లె దేవుణు ముందాల్నె కూక్కి వన్ని లోకుర్ ఇజి కేటక్తి వరిజ్ నెక్కిపోక్వీతాన్. ఏలియ ప్రవక్త దేవుణువెట మొరొ అతాన్ ఇజి దేవుణు మాటాదు రాస్తామన్నిక గుర్తు కిజినిదెర్గదె. వాండ్రు ఇస్రాయేలు లోకుర్ వందిజ్ ఇనిక వెహ్హాన్ ఇహిజ,

3 “ప్రబువా నిజి మహి ప్రవక్తరిజ్ విజేరిజ్ వారు సప్తార్. నిజి సంత సుర్లి సీని మాలి పీటెజ్ వారు డెయ్య పోక్టార్. నిజి నమ్మిని వరి లొఇ నాను ఒరెనె మిగిలిత మన్న. ఏలు నజీబా సప్తైజి సుడేజినార్☆”.

4 గాని దేవుణు వన్నిజ్ ఇనిక వెహ్హాన్ ఇజి గుర్తు మన్నిదెరా?. “నీను ఒరిదె ఆఇ బయాలు ఇని దెయమ్దిజ్ మాడిన్ఇ ఏడు వెయిజ్ లోకురిజ్ నావందిజ్ నాను కేట ఇడ్డ మన్న☆”.

5 అయాలెకెండె యా కాలమ్దుబా దేవుణు యూదురి లొఇ ఉండ్రి ఇజిరి గుంపుదిజ్ కేట ఇడ్తాన్. వన్ని దయాదర్మమదానె వరిజ్ కేట ఇడ్తాన్.

6 లోకుర్, వారు కిత్తి నెగ్గి పణిజ వందిజ్ ఆవిద్ గాని, దేవుణు దయాదర్మమదానె వన్నిముస్కు నమకం ఇడ్డెజ్ అట్టార్. ఎందానిజ్ ఇహిజ వారు కిత్తి నెగ్గి పణిజ్ వందిజ్ దేవుణు వరిజ్ ఎర్లిస్తాన్ ఇహిజ, వన్ని గొప్ప దయ సెడినె దొహ్కొక్కి ఆవిద్గదె.

7 అందెజె ఇనిక జర్గితాద్ ఇహిజ, ఇస్రాయేలులోకుర్ నంఠెండార్ నంఠె ఆసదాన్ రెబాతిక వరిజ్ దొహ్కొవీతాద్. దేవుణు ఎర్లిస్తి ఇడ్డి ఇజిరి గుంపుదివరిజె అక్క దొహ్కొక్తాద్. మిగిలిత్తికార్ దేవుణు వందిజ్ ఇనికబా నెస్తైజ్ అట్ఇ లెకెండె దేవుణు కిత్తాన్.

8 దిన్నివందిజ్ దేవుణు మాటాదు రాస్త మనాద్. ఇనిక ఇహిజ, దేవుణు వరిమన్ను నిద్ర కినివరి మన్నువజ కిత్తాన్. వరిజ్ కణుకెజ్

☆ 11:3 11:3 1రాజు 19:10,14.

☆ 11:4 11:4 1రాజు 19:18.

మహా గాని సుడేనిదన్నిజ్ అర్థం కివర్. వరిజ్ గిబ్బిజ్ మహా గాని వెహిదన్నిజ్ అర్దం కివర్”✧

9-10 దిన్నివందిజ్ దావీదు రాజుబా వెహ్తా మనాన్. వన్ని ముస్సు పగాతి వరివందిజ్ ఈహు వెహ్తాన్ “వారు సర్ల ఆనివలె కిని పణిజ్ వరిజ్ ఉరి లెకెండ్ ఆపిద్. నెగెండ్ మంజినాప్ ఇజి ఒడ్ఱిబినివలె వెటనె వరి ముస్సు నాసనం రపిద్. దేవుణు వందిజ్ నిజమాతిక నెసవిండ ఆనివందిజ్ వరి మన్సు సీకటి ఆజి సొనీద్. వారు గొప్ప బరుదాన్ వజ్నిలెకెండ్ ఆపిద్”.✧

టోటాదు పిరిజిని ఒలివ మరాతు అడివిది కొమెజ్ అంతు తొహ్తాన్.

11 అహిజ, నాను వెన్బాజిన, యూదురు క్రిస్తుజ్ నెక్తిపొక్తిజ్ దేవుణు బాణిజ్ తెగు సొహార్ ఇజి వెహ్తాజ్నా? అవిద్ ఎస్సెజ్బా అవిద్. గాని వారు క్రిస్తు ముస్సు నమకం ఇడేఇతిజ్, క్రిస్తుజ్ నమ్మితిజ్ వాని అయ రక్కుణ దేవుణు యూదురు ఆఇవరిజ్ సిత్తాన్. మజి వానిక వరిజ్ దొహ్కాదా ఇజి యూదురు గోస ఆదెజ్వలె ఇజి యాక జర్గితాదా?

12 యూదురు క్రిస్తుజ్ నెక్తి పొక్తివలె యూదురు ఆఇజాతిదివరిజ్ దీవన దొహ్కాద్ ఇహిజ, వరిజ్ వాతి నస్టం ఆఇవరిజ్ లాబం ఆతాద్ ఇహిజ, దేవుణు ఎర్లిస్సి ఇడ్డి యూదురు దేవుణుబాన్ మర్జి వానివలె, యా లోకమ్ది విజా జాతిదివరిజ్ మరి ఎస్సానో గొప్ప లాబమ్కు వానె!

13 ఏలు యూదురు ఆఇ మిజి నాను వెహ్సిన. యూదురు ఆఇవరిజ్ అపొస్తుడు వజ దేవుణు నజి ఇడ్డిజ్ దన్నివందిజ్ గొప్పజ గవరం దొహ్క మన్సు.

14 దేవుణు నజి ఒవజెప్పి యా పణి కిజి ఎలాగబా నా సొంత జాతి ఆతి యుదురిజ్ గోస పుటిస్సెజ్ ఇజి నాను సుడేజిన. ఎందానిజ్ ఇహిజ మిజి దేవుణు దీవిస్తిలెకెండ్ వరిజ్ దొహ్కెజ్ ఇజి వారుబా ఆస ఆతిజి దేవుణు వరిలోఇ సెగొండారిజ్బా రక్కిస్నాన్.

15 దేవుణు మా సొంత లోకుర్ ఆతి యూదురు నంణెండార్ నెక్తి పొక్తివలె యా లోకమ్దు మన్ని ఆఇజాతిది వరిజ్ నంణెండారిజ్

✧ 11:8 11:8 ద్విత్తి 29:4; యెసయ 29:10.

✧ 11:9-10 11:9-10 కీర్తన

69:22,23.

వన్నిబాన్ కూడుఃప్తాన్, అహిజ దేవుణు యూదురుజ్ వన్నిబాన్ కూడుఃప్పివలె ఇనిక వానాద్? సావుదాన్ బత్కునె వానాద్.

16 ఉండ్రీ దూరు ముదదాన్ తొలిత సుప్తిక దేవుణుదిజ్ సీనిక ఇహిజ అయ ముద విజు దేవుణుదిజ్ సిత్తి లెకెండె. అయవజనె యూదురు దేవుణు లోకురె. ఎందానిజ్ ఇహిజ, వరి అనిగొగొరుబా దేవుణు లోకురె. ఉండ్రీ మరాతి వెల నెగ్గిక ఇహిజ అయ మరాతి కొమెజ్బా నెగ్గికెనె. అయావజనె, యూదురి అనిగొగొరు దేవుణు లోకురకాక వరి కొడొః కొక్తాదికార్బా దేవుణు లోకురె.

17 టోటాదు మన్ని నెగ్గి ఒలివ మరాతి కొమెజ్ సెగం రుక్సిపోక్కిలెకెండె దేవుణు యూదురి సెగొండారిజ్ నెక్త పొక్తాన్. అడివిది ఒలివ మరాతి ఉండ్రీ కొమలెకెండె యూదురు ఆఇ మిజీ టోటాదు మన్ని నెగ్గి ఒలివ మరాతు కూడుఃప్తాన్. అయ నెగ్గి ఒలివ మరాతు కుడుఃప్తిజ్ కొమెజ్, అయ మరాతి వెలెజాణిజ్ కన లాగ్గి సత్తు ఆనివజ మిజీబా యూదురుజ్ దేవుణు సిత్తి దీవన దొహ్క మనాద్.

18 మరాతాన్ కొమెజ్ కొయ్జి విసిర్పిలెకెండె దేవుణు యూదురిజ్ నెక్త పొక్తాన్ గాని యూదురు ఆఇ మీరు గర్త ఆనిక ఆవిద్. మాపు వరిజ్ ఇంక పెరికాప్ ఇజి మీరు గర్త ఆతిజ యాక గుర్తు కిదెజ్. ఇనిక ఇహిజ వెలెజ్ బత్కినిక కొమెజాణిజ్ ఆవిద్. వెలెజ్దానె మీరు బత్కిజినిదెర్.

19 మజి కూడుఃప్తెజ్నె దేవుణు యూదురిజ్ నెక్త పొక్తాన్ ఇజి మీలోఇ ఒరెన్ వెహ్సాన్సు.

20 యాక నిజమె గాని, ఉండ్రీ వెహ్సా. యూదురు క్రీస్తు ముస్కు నమకం ఇడెఇ వందిజె దేవుణు వరిజ్ నెక్త పొక్తాన్. మీరు క్రీస్తుముస్కు నమకం ఇడ్డి వందిజెనె గటిజ నిల్పినిదెర్. అందెజె గర్త ఆమాట్. జాగర్త మండ్రు.

21 ఎందానిజ్ ఇహిజ మరాతి కొమెజ్ ఇహిజ యూదురిజ్ దేవుణు నెక్కిపోక్కి లెకెండె, మీరు నిల్వెండ మహిజ మిజీబా తప్వెండ నెక్కు పొక్తాన్.

22 యాక గుర్తు కిదు. దేవుణు కనికారమ్దాన్ మనాన్. వాండ్రు కొపమ్దాన్బా మనాన్. వన్నిజ్ నెక్కి పొక్కి యూదురువెట దేవుణు

కోపమ్దాన్ మనాన్. గాని యూదురు ఆఇ మిజీ దేవుణు కనికారం తోరిసినాన్. గాని దేవుణు తోరిసి కనికారం మీరు నమ్మిత్తిజ్నేనె మిజీ కనికారం తోరిసినాన్. సిల్లిజ మిజీబా కత్తు విసీర్వాన్.

23 యూదురు క్రీస్తుమున్కు నమకం ఇట్టిజ మరాతు కొమెజ్ మరి అంతు తోహ్విలెకెండ్ దేవుణు వరిజ్ మరి వన్నిబాన్ కూడుఃప్పాన్. ఎందానిజ్ ఇహిజ వరిజ్ కూడుఃప్పెజ్ అట్టాన్.

24 యూదుర ఆఇ మీరు అడఃవిదాన్ తత్తి ఉండ్రీ బలివ మరాతి కొమ లెకెండ్. టోటాదు పిరిజని బలివ మరాతు యా అడఃవిది కొమెజ్ దేవుణు అంతు తోహ్వాన్. యాక మాముల్ జర్గిదెజ్ కన్సం. అహిజ కత్తివిసీర్ది టోటమొక్కాది కొమెజ్ మరి అయ మరాతు అంతు తోహ్వాజ్ ఎస్సానొ నులు. అయా లెకెండ్ నెక్తి పొక్తి యూదురిజ్ మరి వన్నిబాన్ కూడుఃప్పెజ్ దేవుణుదిజ్ ఇని అడ్డు సిల్లెద్.

దేవుణు యూదురుజ్ రక్కిస్సాన్

25 నాను ప్రేమిసిని తంబెరిజాండె, ఏలు ఉండ్రీ డాఃజీతి మన్ని గొప్ప సజతి మీరు నెస్తెజ్ ఇజి నాను వెహ్పిన. నాను ఎందానిజ్ వెహ్పిన ఇహిజ దేవుణు మిజీ కూడుఃప్పివందిజ్ యూదురిజ్ ఇంక తెలిమన్నికాప్ ఇజి మీరు గర్ర ఆవండ మండ్రెజ్ ఇజినె. ఇనిక ఇహిజ యూదురు ఆఇ జాతిదివరి లోఇహాన్ దేవుణుబాన్ వాదెజ్ ఇజి వాండ్రు కేట కిత్తి నస్సాండార్ వన్నిబాన్ కూడుఃపె ఆనిపాక యూదురు దేవుణుదిజ్ నమ్మివండ వరిలోఇ నండొండారి మన్కు వాండ్రు గటి కినాన్.

26-27 యూదురు ఆఇవరి లెక్క పూర్తి ఆతి వెనుక, దేవుణు యూదురుజ్ రక్కిస్సాన్. దేవుణు ప్రవక్త ఒరెన్ రాస్తిలెకెండ్ అక్క జర్గినాద్. ఎలాగ ఇహిజ, “లోకురిజ్ రక్కిస్సాన్, దేవుణు లోకుర్ బాణిజ్ వానాన్. నస్తివలె వాండ్రు మా లోకాజ్ వరి పాపం కిత్తి వందిజ్ ఎత్తుకిని బాణిజ్ డిఃబిస్సాన్. నాను ఒప్పుమానం కిత్తిలెకెండ్ వరి పాపమ్కు నాను లాగ్”✱.

✱ 11:26-27 11:26-27 యెసయ 59:20,21; 27:9; యిర్మీయా 31:33,34.

28 యూదురు సువార్త నెక్తి పోక్తిజ్ దేవుణు వరిజ్, వన్నిజ్ పడిఃఇవరివజ ఇడ్డార్. గాని, వారు దేవుణు ఎర్లిస్తి లోకుర్ కాక దేవుణు వరిజ్ ప్రేమిసినె మనాన్. ఎందానిజ్ ఇహిజు వన్ని అనిగొగొర్ వెట వాండ్రు ఒట్టు కత్తి దన్నివందిజె,

29 దేవుణు యూదురిజ్ ఏలుబా ప్రేమిసినాన్. ఎందానిజ్ ఇహిజు దేవుణు ఎస్సెజ్బా వెప్తిలెకెండ్ కినాన్. వన్ని లోకుర్ ఇజి కూక్తి వరిజ్ ఎస్తివలెబా ప్రేమిస్సాన్. వరిజ్ ఎస్సెజ్బా దీవిస్సాన్.

30 యూదురు ఆఇ మీరు ముందాల దేవుణుదిజ్ లోజీఎండ మహిదెర్. గాని యూదురు దేవుణుదిజ్ లోజీఎండ ఆతిజ్ దేవుణు కనికారం మిజి వాతాద్.

31 అయావజనె, యూదురు దేవుణుదిజ్ లోజీఎండ ఆతిజ్ మిజి ఏలు కనికారం తోరిస్తిలెకెండ్ వరిజ్బా దేవుణు మరి కనికారం తోరిస్సాన్.

32 విజేరెవెట కనికారం తోరిస్సెజ్ ఇజి దేవుణు విజేరిజ్ వారు లోజీఎండ ఆతి మన్నిదన్ని లోఇనె డిఃస్త సిత్తాన్.

33 దేవుణు బుద్ది, గెణం ఎస్సానో గొప్ప పెరిక కొటె. వాండ్రు తీర్మనం కిత్తికెజ్ ఎయెన్బా అర్థం కిదెజ్ అట్ఎన్. వాండ్రు కిని పణి వందిజ్ ఎయెన్బా అర్థం వెప్తెజ్ అట్ఎన్.

34-35 ప్రవక్త దేవుణు మాటదు రాస్తిలెకెండ్ మనాద్ యాక. ఎలాగ ఇహిజు, “దేవుణు ఒడఃబినికెజ్ ఎయెజ్బా తెలివిద్. దేవుణు ఇని ఇనికెజ్ కిదెజ్ ఇజి వన్నిజ్ బుద్ది వెప్తెజ్ ఎయెజ్బా అట్ఎన్✱. “ఎయెన్బా దేవుణుదిజ్ ఇనికబా సీదెజ్ సిల్లెద్. అందెజె దేవుణు ఎయెరిజ్బా మర్ది సీదెజ్ అక్కర్ సిల్లెద్✱”.

36 యాక నిజం ఇజి మాటు నెసినాట్. ఎందానిజ్ ఇహిజు, దేవుణు విజు తయార్ కిత్తాన్. అక్కెజ్ విజు మన్నె. వాండ్రు సిత్తి సత్తుదాన్ అక్కెజ్ బత్తిజినె. దేవుణుదిజ్ పొగడిదెజ్నె అక్కెజ్ మన్నె. విజేరి లోకుర్ దేవుణుదిజ్ ఎస్తివలెబా గొప్ప గవ్ఠం సీజి మనీద్. ఆమెన్.

✱ 11:34-35 11:34-35 యెసయ 40:13.

✱ 11:34-35 11:34-35 యోబు

41:11.

12

కొత్త బత్తు.

1 అందెజె మా తంబెరిజాండె, నాను మీవెట బతి మాల్జిన, దేవుణు మిజీ నిస్సా దయ తోరిస్తివందిజ్ మీరు మిజీనె దేవుణుదిజ్ పూజ లెకెండ సీదు. అయ పూజ బత్తిజి మంజిని వజ మండ్రెజ్వలె, దేవుణుదిజ్ కేట ఆతివజ దేవుణుదిజ్ ఇస్టం ఆతివజ మండ్రెజ్వలె. దేవుణుదిజ్ సీదెజ్ తగితి పొగ్డిఃజి మాడిఃసినిక ఇక్కాదె

2 యా లోకమ్దికార్ బత్తిని వజ దేవుణుదిజ్ పడిఃఏండ బత్తిదెజ్ అవద్. గాని మీ బత్తు ఆనివందిజ్, మీ మన్ను పూర్తి కొత్తాజ్ కిదెజ్ దేవుణుదిజ్ సరి సీదు. ఆహె కిత్తిజి మీరు ఇనిక కిదెజ్ ఇజి దేవుణు కోరిజినాండ్రో అక్క ఎమేణిక ఇజి నెసి ఒప్పుకొండెజ్ ఆనిదెర్. దేవుణు మీ వందిజ్ కోరిజినిక నెగ్గికాదె, వన్నిజ్ ఇస్టం ఆతికాదె, ఇని తక్కు సిల్లికాదె.

3 దేవుణు నజి, వన్ని గొప్ప దయదాన్ నజి అపొస్తుడు వజ ఇడ్డాన్. అందెజె నాను మిజీ విజిదెరిజ్ వెహ్సిన. నాను ఎలాగ మర్తికాన్ ఇజి ఒరెన్ ఒరెన్ ఒడఃబినివలె మీరు మన్నిదన్నిజ్ ఇంక నండో మనాద్ ఇజి మీ వందిజ్ ఒడఃబిమాట్. గాని దేవుణు మిజీ సిత్తి నమకమ్దిజ్ తగితివజ మిజీ మీరె సరిఆతి వజ కొల్ల కిదు.

4 ఉండ్రీ ఒడఃల్దు కాల్కు కిక్కు ఇజి రక రకమ్ది బాగమ్కు మనె, వనక వనక పణిజ్ వేరె వేరె మన్నె.

5 అయవజనె, మాటుబా నండోండార్ గాని క్రిస్తు వెట కూల తొహ్తాజ్ మాటు ఉండ్రె లెకెండ మనాట్. మాటు ఉండ్రె ఒడఃల్దిజ్ నెందితికాట్. ఒరెన్ మరి ఒరెన్ వన్నివందిజ్ మనాన్.

6 దేవుణు వన్ని గొప్ప దయ మజి సిత్తిజ్ నండో రకమ్ది వరమ్కు* సిత్తాన్. యా వరమ్కు మాటు నెగెండ వాడుఃకొండెజ్. దేవుణు సిత్తి మాటెజ్ వెహ్తాజ్ అట్టు ఇహిజ అక దేవుణు నివెట వెహ్తాన్ ఇజి నీను నమ్మిత్తి వజ వెహ్తాజ్.

* 12:6 12:6 వరమ్కు ఇహిజ ఉండ్రీ పణికిదెజ్ దేవుణు సీని ఇనాయం

7 మహివరిజ్ అవ్సరం ఆతికెజ్ కిజి సిదెజ్నా మీ వరం ఇహిజు, అక్క కిదెజ్ దేవుణు మాటెజ్ నెస్పిసి సిదెజ్నా మీ వరం ఇహిజు నెస్పిసి సిదెజ్.

8 మహివరిజ్ దయరం వెహైజ్నా మీ వరం ఇహిజు దయరం వెహైజ్. సీబాజి సినిక మీ వరం ఇహిజు అక్క కల్లి సిల్లి మన్సుదాన్ సిదెజ్. సజుమదిజ్ నడిఃపిసినికాన్ బాగ నడిఃపిస్సెజ్వెలె. బాద ఆతివరిజ్ కనికారం తోరిస్సికాన్, సర్దదాన్ కనికారం తోరిస్సెజ్వెలె.

ఎలాగ ప్రేమకిదెజ్

9 మీరు మహివరిజ్ కల్లి సిల్లెండ పేమిస్సెజ్. దేవుణుదిజ్ పడిఃఇ వనకబాణిజ్ దూరం మండ్రెజ్. అక్కెజ్ ఒద్దె డిఃస్సెజ్. దేవుణుదిజ్ ఇస్టం ఆతి వనకాజ్ డగ్గు కిదు.

10 సొంత ఇండ్రోణివరి లెకెండ్ ఒరెన్ మరి ఒరెన్ వన్నిజ్ నండో ప్రేమిస్సెజ్. మర్యాద సీని దన్నిలోఇ ఒరెన్, మరి ఒరెన్ వన్నిజ్ వాండ్రు నజి ఇంక పెరికాన్ ఇజి మర్యాద సీజి మండ్రెజ్.

11 దేవుణుది సెందితి సజతిజు లోఇ ఉసార్ ఆజి మండ్రు. బండెజ్ అమాట్. ప్రబు పణి లోఇ దేవుణు ఆత్మదాన్ ఉసార్ ఆజి పణికిదు.

12 దేవుణు మీ వందిజ్ గొప్ప సజతిజ్ కినాన్ ఇజి ఎద్రు సుడఃజి సర్దదాన్ మండ్రు. కస్టం వానివలె ఓరిసి మండ్రు. పార్దనం కిదెజ్ మన్ని సజతిజు వందిజ్ డిఃస్ఎండ పార్దనం కిదు.

13 దేవుణుదిజ్ నమ్మిత్తి వరిజ్ ఎయెరిజ్బా ఇనికబా అవ్సరం ఆతిజు వరిజ్ కావాలిస్సికెజ్ సిదెజ్. దూరమ్దాన్ వాజిని వరిజ్ ఇండ్రో కూక్కి మిజి మన్నిబాణిజ్ సీజి మర్యాద కిదు.

14 మిజి బాద కినివరి మున్సు కనికారం తోరిన్అ ఇజి దేవుణుదిజ్ పార్దనం కిదెజ్. ఒబ వరిజ్ దీవిస్సెజ్ ఇజి దేవుణుదిజ్ వెహ్తు వరిజ్ సయివ్ సీఅ ఇజి వెహ్మాట్.

15 సర్ద అని వరివెట సర్ద ఆజి మండ్రు. దుకం ఆతి వరివెట వరి దుకమ్దు కూడఃజి మండ్రు.

16 ఒరెన్ మరి ఒరెన్వెట ఉండ్రె మన్ను ఆజి మండ్రు. గర్ర ఆమాట్. తకుదివరి వెట కూడేజి మండ్రెజ్ మన్ను ఆదు. నానె గొప్ప బుద్ధి మన్నికాన్ ఇజి ఒడేబిమాట్.

17 మిజి సెఇక కినివరిజ్ మర్రి సెఇకెజ్ కిమాట్. నెగ్గిక ఇజి విజేరె ఒప్పుకొడేని పణిజ్నె కిదెజ్.

18 విజేరి వెట సమదనమ్దాన్ మండ్రెజ్ ఒద్దె నెగెండ సుడేదు.

19 నాను ప్రేమిసిని కూలెజాండె, మిజి ఎయెన్బా సెఇక కిత్తిజ వన్నిజ్ మర్రి సెఇక కిమాట్. గాని దేవుణు వన్నిజ్ సిక్స సీదెజ్ డిసిసిదు. దేవుణు మాటదు దన్నివందిజ్ రాస్త మనాద్. ఇనిక ఇహిజ, “లోకు కిత్తి సెఇ పణి వందిజ్ నీను కోపం తీరిస్మా. అక్క నానె తీరిస్సు. నిజి సెఇక కిత్తివన్నిజ్ నాను సిక్స సీన”, ఇజి దేవుణు వెప్పినాన్☆.

20 గాని మరి మీరు ఇనిక కిదెజ్ ఇహిజ; నిజి పగాతి వన్నిజ్ బజ కట్టిజ వన్నిజ్ ఉండెజ్ సిఅ. వన్నిజ్ ఎప్పొ కట్టిజ, ఏరు సిఅ. నస్తివలె వాండ్రు సిగు ఆనాండ్రె వన్ని కోపం డిస్నాన్”,☆ ఇజి రాస్త మనాద్.

21 మరి ఒరెన్ కిత్తి సెఇ పణిదిజ్ తగితి పణి మీరు కిమాట్. గాని మీరు వరిజ్ కిని నెగ్గిపణిజాణిజ్ వరి సెఇ పణిదిజ్ గెలిస్తెజ్.

13

ఏలుబడి: కినివరిజ్ లొజిదు.

1 విజేరె ఏలుబడి: కినివరిజ్ లొజిజి మండ్రెజ్వలె. ఎందానిజ్ ఇహిజ, ఏలుబడి: కినివరిజ్ అతికారం దేవుణునె సీజినాన్. వరిజ్ ఏర్పాటు కిత్తికాన్ దేవుణునె.

2 అందెజె ఏలుబడి: కినివరిజ్ లొజిఇకార్ దేవుణు ఏర్పాటు కిత్తిదన్నిజ్ ఎద్రిసినార్. వరిజ్ తగితి తీర్పుదొహ్కాద్.

3 నెగ్గి పణిజ్ కినివరిజ్ ఆవద్, సెఇ పణిజ్ కినివరిజె ఏలుబడి: కినికార్ తియెల్ తపిస్నార్. అందెజె ఎయెన్బా ఏలుబడి: కినివరిజ్

తియెల్ సిల్లెండ మండ్రెజ్ ఇహిజు, నెగ్గి పణిజ్ కిజి మండ్రెజ్. నస్తివలె ఏలుబడిః కినికార్ మీ వందిజ్ నెగ్గికెజ్ వెహ్సార్.

4 ఎందానిజ్ ఇహిజు మీ నడిఃమి విజు నెగెండ జర్గిదెజ్ ఇజి పణికినికారె వీరు. దేవుణుదిజ్ పణికిదెజ్ దేవుణు ఏర్పాటు కిత్తికారె వీరు. మీ లొఇ ఎయెన్బా తప్పు కిత్తిజు వాండ్రు తియెల్ ఆదెజె. ఎందానిజ్ ఇహిజు తప్పు కిత్తివరిజ్ సిక్స సీదెజ్ విరిజ్ అతికారం మనాద్. దేవుణు ఏర్పాటు కిత్తిజ్ దేవుణు వందిజ్ పణికినికార్ లెకెండ, వారు తప్పు కినివరిజ్ సిక్స సీనార్.

5 అందెజె అతికారి లోకాజ్ లొజిజి మండ్రెజ్ వలె. సిక్సదాన్ తప్తె ఆదెజ్ ఉండ్రె ఆవిద్, లొజిజి మంజినిక సరి ఆతికదె ఇజి నెస్తిబా లొజిదెజ్ వలె.

6 ఏలుబడిః కినికార్ దేవుణుదిజ్ పణికిజినార్. వారు అయి ఏలుబడిః కినిపణి వందిజె కాలం విజు గడఃప్పినార్. అందెజె మీరు వరి వందిజ్ పన్నుబా తొప్పినిదెర్.

7 ఎయెరిజ్బా ఇనికబా సీదెజ్ ఇహిజు అక్కెజ్ సీదెజ్. ఎంబెబా పన్ను తొహ్తాజ్ మహిజు బాన్ పన్ను తొహ్తాజ్. ఎయెరిజ్ మర్యాద సీదెజ్ ఇహిజు వరిజ్ మర్యాద సీదెజ్. ఎయెరిజ్ గవరం సీదెజ్ ఇహిజు వరిజ్ గవరం సీదెజ్.

ప్రబు మర్జి వాజిని కాలం డగ్గు ఆత మనాద్

8 ఎయెర్బాన్బా అప్పు తీరిన్ఎండ ఇడమాట్. ఎసెజ్బా ఒరెన్ మరి ఒరెన్ వెట ప్రేమిన్సికాదె అప్పు లెకెండ మనీద్. మహివరిజ్ ప్రేమిన్సికాన్ దేవుణు రూలుజు పూర్తి లొజినాన్.

9 దేవుణు రూలుజు లొఇ రకరకమ్వి రూలుజ్ మనె. వనకలొఇ సెగం ఇనికెజ్ ఇహిజు, “రంకు బులాదెజ్ ఆవిద్. లొకాజ్ సప్తెజ్ ఆవిద్. డొజు కిదెజ్ ఆవిద్. ఆఇవరిజ్ మన్నికెజ్ నజి కావాలి ఇజి సెఇ ఆస ఆదెజ్ ఆవిద్” గాని యా రూలుజ్ విజు కూడుఃప్తిజు, యాకాదె, “నీను నిజి ప్రేమిన్అ☆”, ఇజినె.

☆ 13:9 13:9 నిర్గమ 20:13-15,17.

10 మహి వరిజ్ ప్రేమిస్తిజు వరిజ్ ఇని తప్పుబా నీను కిజ గదె. అందెజె మహివరిజ్ ప్రేమిసినికాన్ దేవుణు రూలుజు విజు వనకాజ్ పూర్తి లోజిజినాన్.

11 నాను వెహ్తాలెకెండ్ మీరు కిజి మండ్రెజ్ వలె. ఎందానిజ్ ఇహిజు, మాటు బత్కిని యా కాలం నండొ ముకెలమాతి కాలం ఇజి మీరు నెసినిదెర్. ప్రబు మర్తి వాజి మజి రక్కిసిని కాలం డగ్గు ఆత మనాద్ కాక నిద్రదాన్ నిజ్జి తెలి ఆతివరి వజ జాగర్త మండ్రు. తొలిత మాటు నమ్మిత్తి మహి కాలమ్దిజ్ ఇంక అయ సమయం డగ్గు ఆత మనాద్.

12 రెయు అందిజి వాజినిలెకెండ్ మా బత్కుబా అందిజి వాజినాద్. క్రీస్తు మర్తి వాని కాలం డగ్గు ఆత మనాద్. అందెజె సికటిదు కిని సెఇ పణిజ్ విజు డిసి సిదెజ్. వేడెక విదెమ్దిజ్ సొనికాన్ దన్నిజ్ కావాలిస్తికెజ్ తోడుగిజి విదెమ్దిజ్ తయార్ అనిలెకెండ్, సెఇ వనకాజ్ ఎద్రిస్టెజ్ తయార్ ఆజి మండ్రు.

13 సికటుదు కిని సెఇ పణిజ్ డిసి సీజి మాటు జాయ్దు నడిసి మండ్రెజ్. కల్లు విందుజు సొన్ని ఉణిజి సొస్టెజ్ అవిద్. మొగ కొడొర్ గాని అయ్లి కొడొక్ గాని రంకు బూలదెజ్ అవిద్, టంటెజ్ ఆదెజ్ అవిద్, గోస ఆదెజ్ అవిద్.

14 మరి ఎలాగ మండ్రెజ్ ఇహిజు, మహి లోకురిజ్ తోర్నివజు మీరు ప్రబు ఆతి యేసుక్రీస్తు లెకెండ్ మండ్రు. మీ ఒడొల్లి సెఇ ఆసెజు వజ కిజి సర్గ ఆదెజ్ ఇజి ఒడొబిజి మంజిని మన్నుదాన్ మన్మాట్.

14

అనుమానం ఆని నమ్మితికార్ వందిజ్

1 ఇని ఇనికెజ్ కిదెజ్ దేవుణు సరి సీనాండ్రొ ఇజి అనుమానం ఆని నమ్మితికార్ మనార్. వారు నమ్మిత్తి దిన్నివందిజ్ పూర్తి అర్థం కిఇకార్ గాని వరిజ్ డగ్గు కిదు. గాని నమ్మితికార్ ఇని ఇనికెజ్ కిదెజ్ అనాద్ ఇజి ఒడొబిని దన్నిలోఇ తేడ వానివలె పరివెట వాదిస్మాట్.

2 విజు తిండ్రెజ్ ఆనాద్ ఇజి ఒరెన్ నమ్మిజినాన్. మరి ఒరెన్ కుసెజ్నె తింజినాన్. ఎందానిజ్ ఇహిజు, వారు నమ్మిత్తి దిన్నివందిజ్ పూర్తి అర్థం ఇంక కివన్.

3 విజు తినికాన్, విజు తిన్ ఇ వన్నిజ్ తక్కుదికాన్ ఇజి సుడ్ దెజ్ ఆవద్. విజు తిండ్రెజ్ ఆవద్ ఇజి ఒడెబినికాన్ విజు తినికార్ తప్పు కిజినార్ ఇజి వెహైజ్ ఆవద్. ఎందానిజ్ ఇహిజు దేవుణు వరిజ్ డగ్రు కిత్త మనాన్.

4 మరి ఒరెన్ ఎజమానిజ్ వన్ని పణిమణిసి కినికెజ్ సరియాతికెజ్నో, ఆఇకెజ్నో ఇజి వెహైజ్ తగితికార్ మీరు ఆఇదెర్. వాండ్రు కిని పణిజ్ నెగ్గికెజ్నో సెఇకెజ్నో ఇజి వన్ని ఎజమానిసె వెహైజ్. అయావజనె నమ్మితికాన్ కినిపణిజు వందిజ్ దేవుణునె తీర్పు కిజి సరిఆతికదో ఆవదో ఇజి వెహైజ్. ఎందానిజ్ ఇహిజు సరిఆతిక కిదెజ్ దేవుణు వన్నిజ్ సత్తు సినాన్లె.

5 నెగొండార్, ఉండ్రె రోజు మహి రోస్కాజ్ ఇంక నెగ్గి రోజు ఇజి ఒడెబిజినార్. మరి ఒరెన్ విజు రోస్కు ఉండ్రె లెకెండ్ సుడెబిజినాన్. ఒరెన్ ఒరెన్ వన్నిజ్ వాండ్రె వన్ని మన్నుదు ఒడెబినిక ఎందానిజ్ ఆహు ఒడెబిజినాన్ ఇజి టోటాజ్ నెసి తిర్మానం కిదెజ్ వెలె.

6 ఉండ్రె రోజు నెగ్గి రోజు ఇజి ఇడ్మికాన్ అక్క ప్రబు వందిజ్ ఇడ్మికాన్. విజు తినికాన్ ప్రబుజ్ వమదనమ్కు వెహై ప్రబుజ్ గవరం సీదెజ్ ఇజి తింజినాన్. విజు తిన్ ఇకాన్ తిని వనక వందిజ్ ప్రబుజ్ వందనమ్కు వెహై ప్రబుజ్ గవరం సీదెజ్ ఇజి విజు తిన్ ఎండ మంజినాన్.

7 మా లోఇ ఎయెన్ బా వన్నిజె సర్ల కిబిసైజ్ ఇజి బత్కిఎన్. వన్ని వందిజె సర్ల కిబిసైజ్ ఇజి సాఎన్.

8 ఎందానిజ్ ఇహిజు మాటు బత్కినివెలె ప్రబుజ్ ఇన్టం కిబిన్ని లెకెండ్ బత్కిదెజ్. సానివల ప్రబుజ్ ఇన్టం కిబిన్ని లెకెండ్ సాదెజ్ వలె. అందెజె మాటు బత్కితిజ్ బా సాతిజ్ బా ప్రబుజ్ సందితికాటె.

9 దినివందిజె సాతి వరిజ్ ని బత్కిని వరిజ్ విజెరిజ్ ప్రబు లెకెండ్ మండ్రెజ్ క్రిస్తు సాజి మర్జి బత్కితాన్.

10 అహిజ, ఎయెర్బా మరి ఒరెన్ వన్నిజ్ తీర్పు తీరిస్తెజ్ ఆవద్. ఎయెర్బా తకుదికాన్ ఇజి సుడెడెజ్ ఆవద్. ఎందానిజ్ ఇహిజ మాటు విజెట తప్పు కితికాటో, సరి ఆతిక కితికాటో ఇజి దేవుణు తీర్పు కిదెజ్ వన్ని ఎద్రు నిల్వొట్.

11 దినివందిజ్ మాటు ఎలాగ నెసినాట్ ఇహిజ, ప్రబు వెప్తి మాటెజ్ ఈహు రాస్త మనాద్. ఇనిక ఇహిజ, “నాను ఒద్దె నిజం వెహిన, నానె దేవుణు ఇజి లోకుర్ విజెరె నా ఎద్రు ముణుకుజ్ ఊర్నార్. నానె దేవుణు ఇజి లోకుర్ విజెరె ఎద్రు వెహార్”.

12 అహిజ, ఒరెన్ ఒరెన్ కిత్తి దన్నివందిజ్ దేవుణు ఎద్రు లెక్క ఒపజెప్తెజ్ వలె. దేవుణు తీర్పు తీరిన్నాన్.

13 అందెజె ఆఇవరిజ్ తీర్పు తీరిసినిక డిఃసిసీనాట్. అక్కాదె ఆఎండ, మరి ఒరెన్ నమ్మిత్తి వన్నిజ్ తప్పు సరిదు నడిఃపిసిని ఇనికబా కిదెజ్ ఆవద్ ఇజి మీ మన్నుదు ఒప్పుకొండు.

14 నాను యేసుప్రబు వెట కూడిఃతిజ్ ఉండ్రె నిజం నెసిన. ఇనిక ఇహిజ, తిండ్రెజ్ ఆవద్ ఇజి దేవుణు వెప్తి తిండి ఇనికబా సిల్లెద్. గాని ఇనికాదొ ఉండ్రె తినిక ఆవద్ ఇజి ఎయెర్బా ఒడఃబిత్తిజ అక్క వాండ్రు తినిక తప్పు.

15 నీను ఇనికదొ ఉండ్రె తిని దన్నిదాన్ మరి ఒరెన్ నమ్మితికాన్ మన్నుదు బాద ఆతిజ నీను వన్ని మున్ను ప్రేమ తోరిన్ఇ. నీను తినిదన్నిదటాన్ మరి ఒరెన్ నమ్మిత్తి వన్ని నమకమ్దిజ్ పాడు కిమా.

16 నెగ్గికెజ్ ఇజి ఒడఃబిజి నీను కినికెజ్, మరి ఒరెన్ నమ్మితి వన్నిజ్ పాపం కిదిస్తెజ్ తగితికెజ్ ఇహిజ అక్కెజ్ సెఇకెజ్ ఇజి వారు వెహార్. అందెజె నెగ్గిక ఇహిజ్బా కిమా.

17 దేవుణు ఏలుబడిః కినిదన్నిజ్ లొజిజి మండ్రెజ్ ఇహిజ, ఇనికెజ్ తిండ్రెజ్ ఉండెజ్ ఇజి రూలుజ్ ఆఉ. గాని దేవుణు ఏలుబడిఃదిజ్ ఎలాగ లొజిదెజ్ ఇహిజ, ఆత్మ సత్తుదాన్ దేవుణుదిజ్ ఇన్టం ఆతి వజ కిదెజ్, లోకుర్ వెట సమదనమ్దాన్ మండ్రెజ్, మన్ను లొఇ సర్ల నిండ్రెజి మండ్రెజ్.

18 యా లెకెండ్రో క్రీస్తుజ్ లోజీనికాన్ దేవుణుదిజ్ ఇన్ఱం కిబిస్సాన్. లోకుర్ వన్నిజ్ నెగ్గికాన్ ఇజి వెప్పూర్.

19 అందెజె మాటు ఒరెన్ మరి ఒరెన్ వన్నివెట సమదనమ్దాన్ మండ్రెజ్ సుడెదెజ్ వెలె. మాటు ఒరెన్ మరి ఒరెన్ వన్నిజ్ నమకమ్దు సత్తు కిబిస్సెజ్ సుడెదెజ్ వెలె.

20 ఇని తిండిబా తిండ్రెజ్ ఆనాద్ ఇజి ఒడెబిజి, దేవుణు కిత్తి పణిజ్ పాడె: కిమా దేవుణు సుడెతిజ్ విజు రకమ్ది బోజనమ్కుబా తిండ్రెజ్ ఆనికెజ్ గాని, నీను తినిక, తిండ్రెజ్ ఆఇకెజో ఇజి మరిఒరెన్ వన్నిజ్ తప్పు కిబిస్సెజి అక్క తినిక తప్పునె.

21 కండ తింజి గాని ద్రాక్క కల్లు ఉణిజి గాని, మరి నన్నిపణిజ్ ఇనికెజ్ గాని కిత్తిజి అక్క మరి ఒరెన్ నమ్మితి వన్నిజ్ తప్పు కిబిస్సెజ్ కూడితిజి అక్కెజ్ డిస్సికాదె నెగ్గిక.

22 నిన్ని సజతిజి వందిజ్ నీను నమినికెజ్ నీను ఆఇవరిజ్ వెప్టాజ్ పోని. నిన్ని సజతిజ్ నీనుని దేవుణు నెస్తిజి ఆనె. ఉండ్రె పణికిత్తి వెనుక, సరి ఆతిక కితానో, సిలిజి తప్పు కితానో ఇజి అనుమానం అవిండ మహిజి నీను దేవుణుబాణిజ్ సర్ద తసిని.

23 గాని ఉండ్రె తినిక దేవుణు ఎద్రు సరిఆతికదో అవదో ఇజి అనుమానం ఆనికాన్, అక్క తిహిజి తప్పు కితాన్ ఇజి తిర్పు వానాద్. ఎందానిజ్ ఇహిజి, తిండ్రెజ్ ఆఇక ఇజి ఇడ్డిక వాండ్రు తిహాన్. మాటు ఇనిక కిత్తిజ్బా దేవుణు ఎద్రు సరి ఆతిక కిత ఇజి నమకం సిలిజి అక తప్పునె.

15

1 ఇనిఇనికెజ్ సరిఆతికెజ్ కిదెజ్ ఆనె ఇజి మన్నుదు బాగ నెసిని నమ్మిత్తికాల్ ఆతి మాటు మజి ఇన్ఱం ఆతికెజ్ ఉండ్రెనె కిజి మండ్రెజ్ అవిద్. గాని అనుమానం ఆతివరిజ్ మాటు బరిస్సెజ్ వలె.

2 మరి ఒరెన్ నమకమ్దు పిరినివందిజ్ మా లోఇ ఒరెన్ ఒరెన్ వన్నిజ్ నెగ్గికెజ్ కిజి సర్ద కిబిస్సెజ్.

3 క్రీస్తు కిత్తి లెకెండ్ మాటు కినాట్. క్రీస్తు వన్ని సర్ల ఉండ్రె వందిజ్ నె తొఎండ దేవుణుదిజ్ ఇస్టం ఆతిలెకెండ్ కిత్తాన్. కీర్తన పుస్తకమ్దు రాస్తి లెకెండ్, “లోకుర్ నిజి నింద కిత్తివెలె, అయ నింద నజి వెప్తొ లెకెండ్”, ఇజి క్రీస్తు దేవుణుదిజ్ వెప్తొన్.

4 దేవుణు మాటదు ముందాల్ రాస్తి మన్నికెజ్ విజు మజి నెస్పిస్తైజె రాసె ఆత మనాద్. ఎందానిజ్ ఇహిజు, మాటు ఓర్పుదాన్ మంజి దేవుణు మాటెజ్ మజి ఉసార్ కిబిసి, మాటు ఆసదాన్ ఎర్దు సుడెజి మండ్రెజ్ వలె.

5-6 మజి ఓర్పుని ఉసార్ కిబిస్సిక దేవుణు ఉండ్రె మన్ను ఆజి మండ్రెజ్ సాయం కిపిన్. ఇహిజు యేసు క్రీస్తు వజ మండ్రు. నస్తివలె మా ప్రబు అతి యేసు క్రీస్తుజ్ బుబ్బు ఆతి దేవుణుదిజ్ ఉండ్రె మన్ను ఆజి ఉండ్రె లెకెండ్ పొగ్డిడెజ్ ఆనిదెర్.

7 అహిజు క్రీస్తు మిజి డగ్గు కిత్తి లెకెండ్ మీరు ఒరెన్ మరి ఒరెన్ వన్నిజ్ డగ్గు కిదు. ఎందానిజ్ ఇహిజు అహు కిత్తిజు లోకుర్ దేవుణుదిజ్ పొగ్డిడెనార్.

8 నాను ఇనిక వెప్సిన ఇహిజు, దేవుణు నమ్మిడెజ్ తగ్గికాన్ ఇజి, ఇహిజు వాండ్రు, మాటు యూదురి అనిగొరిజ్ కిత్తి ఒటు లెకెండ్ నిజం కినాన్ ఇజి తొరిస్తైజ్ ఇజి క్రీస్తు యూదురిజ్ పణి మణిసి ఆత మహాన్.

9 అక్కాదె ఆవదు, యూదురు ఆఇజాతిదికార్ దేవుణు తొరిస్తి గొప్ప కనికారం వందిజ్ దేవుణుదిజ్ పొగ్డిడెజ్ ఇజిబా క్రీస్తు యూదురిజ్ పణిమణిసి ఆతమహాన్. ఎలాగ ఇహిజు, “అందెజె నాను యూదురు ఆఇ లోకుర్ నడిమి నిజి పొగ్డిడెజు. నిజి పొగ్డిడెజి పాటెజ్ పార్లు”, ఇజి రాస్తై మన్నె.

10-11 ఈహుబా రాస్తై మనాద్, “యూదురు ఆఇజాతిదికార్ ఆతికిదెరా మీరు దేవుణు లోకుర్ వెట సర్ల ఆదు”*. మరి ఉండ్రెబాన్ ఈహు రాస్తై మనాద్. “యూదురు ఆఇజాతికార్ ఆతికిదెరా, మీరు ప్రబుజ్ పొగ్డిడెదు. విజెరె లోకుర్ వన్నిజ్ పొగ్డిడెదు”*

☆ 15:3 15:3 కీర్తన 69:9. ☆ 15:9 15:9 2సము 22:50; కీర్తన 18:49.

☆ 15:10-11 15:10-11 ద్వ్యతీ 32:43. ☆ 15:10-11 15:10-11 కీర్తన 117:1.

12 మరి యెసయ ప్రవక్త ఈహె వెహ్నినాన్, “యెస్సయి తెగాదికాన్ ఒరెన్ వానాన్లె. యూదురు ఆఇవరిజ్ ఏలుబడిః కినికాన్ వానాన్. వన్నిజె వారు ఆసదాన్ ఎద్రు సుడఃజి మంజినార్”✱.

13 ఎద్రు సుడఃజి మండ్రెజ్ మిజి అటిసిని దేవుణుదిజ్, మీరు నమ్మిజి మంజనిదెర్ కాక మీ లొఇ సర్దని సమదనం నిండ్రిపిన్. ఎందానిజ్ ఇహిజ, అసదాన్ ఎద్రు సుడఃజి మంజిని లొఇ దేవుణు ఆత్మ సత్తు మిజి మరి నండొ పిరిపైజ్ ఇజి.

దేవుణు సువార్త యూదురు ఆఇకార్బా వెంజినార్

14 నమ్మితి తంబెరిజాండె, మీరు ఒరెన్ మరి ఒరెన్ వెట నెగెండ మంజనిదెర్ ఇజి నాను నెసిన. మీరు బాగ నెస్తెజ్ ఇజి దేవుణు సుడఃజినికెజ్ విజు మీరు నెస్సిదెర్ ఇజి నాను నెసిన. ఒరెన్ మరి ఒరెన్ వన్నిజ్ బుద్ధి వెహ్ని నెస్సిస్తెజ్ అట్టిదెర్ ఇజి నాను మీ వందిజ్ నిజం నెసిన.

15-16 గాని నాను యా ఉత్రమ్దు సెగం సజతిజ వందిజ్ మిజి ఎతు కిబిస్సివలె దయరమ్దాన్ వెహ్న. ఎందానిజ్ ఇహిజ, యేసుక్రీస్తుజ్ ఉండ్రీ పణిమన్ని లెకెండ యూదురు ఆఇ జాతిది వరి నడిఃమి మండ్రెజ్ ఇజినె దేవుణు వన్ని గొప్ప దయాదర్మం నా మున్కు తోరిస్తాన్. దేవుణు ఆత్మ వరిజ్ కేటకిజి దేవుణుదిజ్ సీదెజ్ తగితి ఉండ్రీ పూజ లెకెండ వరిజ్ తయార్ కినికాదె నా పణి. దన్నివందిజె ఒరెన్ పుజెరి లెకెండ నాను వరిజ్ సువార్త వెహ్నిన.

17 అందెజె, నాను క్రీస్తుయేసు వెట కూడఃజి మన్నిజ్, దేవుణుదిజ్ కిని సేవ పణివందిజ్ పొగ్గడిఃజిన.

18 యూదురు ఆఇకార్ దేవుణుదిజ్ లొజిని వందిజ్ క్రీస్తు నా వెట కిత్తి పణిజ్ ఉండ్రె వందిజె నాను దయరమ్దాన్ వెహ్నిన. నాను నా మాటెజాణిజ్, నా పణిజాణిజ్ దేవుణుదిజ్ లొజిదెజ్ వరిజ్ నడపిస్త.

19 బమ్మాతి పణిజాణిజ్ని దేవుణు ఆత్మ సత్తుదాన్ నడఃపిస్త. ఆహె యెరూసలేం పట్నం మొదొల్ని అయ సుట్టు పడఃక మన్ని పట్నమ్కు

✱ 15:12 15:12 యెసయ 11:10.

విజు ఇలారికు ఇని పట్నం దాక విజు బాడ్డిజు సొన్ని నాను క్రీస్తు వందిజ్ సువార్త పూర్తి సాటిస్త మన్న.

20 క్రీస్తు వందిజ్ సాటి ఆఇ బానె సువార్త సాటిస్తెజ్ ఇజినె నజి ఉండ్రి ఆస. ఎందానిజ్ ఇహిజు, మరి ఒరెన్ సువార్త కినిబాన్ సొన్ని వన్ని పణి లాగ్జెజ్ ఆవిద్ ఇజినె నా మన్న.

21 గాని నాను ఇనిక కిత్త ఇహిజు, దేవుణు మాటదు రాస్తిమన్ని లెకెండ్ కిత్త, “వన్నివందిజ్ ఎసెజ్ బా వెహె ఆఇకార్ వన్నివందిజ్ నిజం ఆతిక సూణార్. వన్నివందిజ్ ఎసెజ్ బా వెహె ఆఇకార్ వన్నివందిజ్ అర్థం కినార్”✱.

22 యా పణికిజి మహిజ్ నాను మీబాన్ వాదెజ్ నండొ అడ్డు ఆత మహాద్.

పవులు రోమపట్టణం సొండ్రెజ్ ఒడెబిజినాన్

23-24 గాని ఏలు యా ప్రాంతమ్కాజ్ మన్ని పణిజ్ వీజితె. నండొ పంటజ్ అన్నిబా మీబాన్ వాజి మిజి సుడెదెజ్ ఆస ఆతిజ్ బా, ఏలు వాదెజ్ ఎద్దు సుడెజిన. నాను స్పెయిను దేసెం సొని సరిదాన్, మిజి వాజి సుడెజి సణెం మీ వెట మంజి సర్ల ఆదెజ్ ఆస ఆజిన. బాణిజ్ సొనివెలె మీబాణిజ్ సాయం దొహ్కెజ్ ఇజి సుడెజిన.

25 గాని, ఏలు యెరూసలేమ్దు మన్ని దేవుణుదిజ్ నమ్మిత్తి వరిజ్ డబ్బు ఒత్తెజ్ యెరూసలేమ్దు సొన్నిన.

26 ఎలాగ ఇహిజు యెరూసలేమ్దు మన్ని నమ్మిత్తి వరి లొఇ డబ్బు సిల్లివరిజ్ సంద సీదెజ్ మాసిదొనియ ప్రాంతమ్దు మన్ని నమ్మిత్తికార్ని అకాయ ప్రాంతమ్దు మన్ని నమ్మిత్తికార్ వారె ఆజి ఇస్టం ఆతార్.

27 ఒబ, వారు సీదెజ్ ఇస్టం ఆతారె సీజినార్. నిజమె, యూదురు ఆఇకార్ యెరూసలేమ్దు మన్ని దేవుణు లోకురిజ్ సాయం కిదెజ్ నె. ఎందానిజ్ ఇహిజు, యూదురు ఆఇవరిజ్ ఉండ్రి అప్పు మనాద్. ఎలాగ ఇహిజు, దేవుణు యూదురిజ్ సిత్తి దీవనమ్కు ఆఇ జాతిదివరిజ్ బాట

✱ 15:21 15:21 యెసయ 52:15.

వాతాద్. అందెజె యూదురిజ్ తక్కు ఆతిక యూదురు అఇకార్ వరిజ్ మన్నివనక లొఇహాన్ బాట కిజి సీదెజె.

28 యా పణి వీజ్త ఇహిజ, వరిజ్ సీదెజ్ మన్ని డబ్బు పూర్తి వరిజ్ తప్ఎండ సిత్తి వెనుక నాను యెరూసలెం పట్టుమ్దాన్ స్పెయిను సొని సరిదు మీబాన్ వానా.

29 నాను మీబాన్ వానివలె క్రీస్తుబాణిజ్ మజి విజెరిజ్ గొప్ప పెరి దీవనమ్కు దొహ్కె ఇజి నాను నెసిన.

30 ఏలు తంబెరిజాండె, ప్రబు ఆతి యేసుక్రీస్తు మున్ను మన్ని నమ్మకం మన్నిదన్నివందిజ్, దేవుణు ఆత్మ మిజి సిత్తి దన్నివందిజ్, మీరు నా వందిజ్ గట్టిజ పార్దనం కిదు ఇజి నాను బతిమాల్జిన.

31 యూదయ దేసమ్దు యేసుప్రబుజ్ నమ్మిఇ యూదురు బాణిజ్ నజీ ఇని ప్రమాదం రెండె మండ్రెజ్ పార్దనం కిదు.

32 మరి దేవుణు సిత్తం ఆతిజ నాను సర్దదాన్ వాజి మీబాన్ రోమ్దెజ్ ఇజిబా పార్దనం కిదు.

33 మజి నమదనం సీని దేవుణు మిజి తోడు మనీన్.

16

రోమ పట్టుమ్దు సెగొండార్ నమ్మితి వరిజ్ పవులు వందనమ్కు వెప్పినాన్.

1 కెంకెయాదు మన్ని దేవుణు సజమ్దు సేవ కిదెజ్ ఏర్పాటు ఆతి పిబె ఇని మా బీబి వందిజ్ నాను వెప్పిన. అది గొప్ప నెగ్గికాద్.

2 దేవుణుదిజ్ నమ్మిత్తి దన్నిజ్, నమ్మితికార్ కిదెజ్ తగితి లెకెండ డగ్గు కిదు. దన్నిజ్ కావాస్తిక ఇనికబా మీబాన్ మహిజ, మీబాణిజ్ సీజి మండ్రు. ఎందానిజ్ ఇహిజ, అది నండెండారిజ్ మరి నజీబా సాయం కిజి మహాద్.

3 క్రీస్తు వందిజ్ మా వెట కూణ్జి పణికిత్తి మహి ప్రిస్కిలాదిజ్ని దన్ని మాసి అకులాదిజ్బా మా వందనమ్కు వెప్పు.

4 వారు నా పాణం వందిజ్ వరి పాణమ్ కు సీదెజ్ తయార్ ఆతికార్. నాను ఒరెనె ఆఏ, యూదురు ఆఇవరి సజమ్ కు విజు వారు కిత్తి దన్ని వందిజ్ వందనమ్ కు వెప్పినార్.

5 మరి వరి ఇండ్రొ మన్ని నమ్మిత్తివరిజ్ బా వందనమ్ కు వెప్పు ఆసియ ప్రాంతమ్ దు తొలిత క్రిస్తు ముస్కు నమకం ఇడ్డి, నాను ప్రేమిసిని ఎపాయి నెటుజ్ వందనమ్ కు వెప్పు.

6 మీ వందిజ్ నండొ కస్టబాడ్ డిజి పణి కిత్తి మరియెజ్ వందనమ్ కు.

7 నావెట జేలిదు మహి, నా సొంత లోకుర్ యూదురు ఆతి అండ్రొనికుని, యూనియాకు వందనమ్ కు వెప్పిన. వారు అపొస్తురు నడిమి పెరికార్ ఇజి విజేరె నెసినార్. నజీ ఇంక ముందాల్ వారు క్రిస్తు లోకు ఆతికార్.

8 ప్రబు వందిజ్ నాను నండొ ప్రేమిసిని అంప్లియతుజ్ వందనమ్ కు.

9 క్రిస్తు వందిజ్ మా వెట పణి కిత్తి ఉర్బానుజ్ వందనమ్ కు. నాను నండొ ప్రేమిసిని స్థాకుజ్ వందనమ్ కు.

10 క్రిస్తు ముస్కు నిజమాతి నమకం ఇడ్డాన్ ఇజి రుజుప్ కిత్తి మన్ని అపెలుజ్ వందనమ్ కు. అరిస్తోబులు ఇండ్రొణి వరిజ్ వందనమ్ కు.

11 నా సొంత లోకు యూద వాండ్రు ఆతి హెరొదియెనుజ్ వందనమ్ కు. నర్కిసు ఇండ్రొణి వరి లొఇ ప్రబు ఆతి క్రిస్తుజ్ నెందితి వరిజ్ వందనమ్ కు.

12 క్రిస్తు వందిజ్ కస్టబాడ్ డిజి పణి కినికెజ్ ఆతి త్రువయానుజ్ ని త్రపొసానుజ్ వందనమ్ కు.

నాను నండొ ప్రేమిసిని పెర్నిసుజ్ వందనమ్ కు. అది ప్రబు వందిజ్ నండొ కస్టబాడ్ డిజి పణి కితామహాద్.

13 ప్రబు వందిజ్ గొప్ప నెగ్గికాన్ ఇజి కేట ఆతి రుపసుజ్ వందనమ్ కు. వన్ని అయ్ సీజ్ వందనమ్ కు. అది నజీబా యాయ వజనె.

14 అసున్ క్రిస్తుజ్, ఫ్లెగొముజ్, హెర్ మెకునుజ్, పత్రోబుజ్, హెర్ మెకునుజ్, వరి వెట మన్ని నమ్మితి వరిజ్ వందనమ్ కు.

15 పిలోగునుజ్, యూలియాకుజ్, నెర్యాతునుజ్, వన్ని తజిసిజ్, ఒలంపాకుజ్ వరివెట మన్ని నమ్మితి వరిజ్ వందనమ్కు.

16 నమ్మిత్తి వరిజ్ తగితి లెకెండ ఒరెన్ మరి ఒరెన్ వన్నిజ్ ముదు కిజి వందనమ్కు వెహ్టూ. యా బాడ్డిదు క్రిస్తుజ్ నమ్మితి సజమ్కాణికార్ మిజి వందనమ్కు వెహ్టూనార్.

17 నమ్మితి తంబెరిజాండె, మీరు నెస్తి మన్ని బోదదిజ్ డిసిసిసి దన్నిజ్ వెత్రేకం ఆతి బోద నెస్సిసి ఆఇ గుంపుజ్ కిదెజ్ ఇజి వెహ్టూనార్ మనార్. వరి వందిజ్ జాగర్త మండ్రు. నన్నివరి బాణిజ్ దూరం మండ్రు ఇజి నాను బతిమాల్లి వెహ్టూన.

18 నన్నికార్ మా ప్రబు ఆతి క్రిస్తుజ్ పణి కినికార్ ఆవర్. గాని వారు వరిజ్ ఇన్టం ఆతి దన్నివందిజె బత్తిజినార్. నెగ్గి మాటెజ్ వెహ్టూవజ బడాఱి మాటెజ్ వెహ్టూ వీరు మొసెం కిజినార్. వారు సెఇలోకు ఇజి నెస్ఇకార్ వరి మాటెజాణ్ మొసెం కిబె ఆనార్.

19 మీరు దేవుణు మాటదిజ్ లోజిత్తి మన్నికార్ ఇజి విజేరె నెహ్టూనార్. అందెజె మీ వందిజ్ నాను సర్ల ఆజిన. గాని మీరు నెగ్గిక ఇనిక ఇజి నెస్సి దన్నిలోఇ బుద్ది కల్లిజి మండ్రు. సెఇ వనకవెట కూడఱివండ దన్నివందిజ్ కల్లిసిల్లెండ మండ్రు ఇజి నాను ఆస ఆజిన.

20 సమదనం సీని దేవుణు, సయ్తూను సత్తు పాడుఱిజి వనిజ్ మీ కాల్యాజ్ అడగి బేగినె సిదులు మటిస్సాండ్రె ఇహ్నాన్. ప్రబు ఆతి యేసుబాణిజ్ దయాదర్మం మిజి తోడు మనిద్.

21 మా వెట కూడఱిజి పణికిని తిమోతి మిజి వందనమ్కు వెహ్టూనాన్. నా సొంత లోకుర్ యూదురు ఆతి లూకియ, యాసోను, సొసి పత్తు ఇనికార్ వందనమ్కు వెహ్టూనార్.

22 పవులు వెహ్టూ సిత్తిజ్ యా ఉత్తం రాసిని తెర్తియు ఇని నాను ప్రబు వందిజ్ వందనమ్కు వెహ్టూన.

23 సజమ్దు కూడఱిజిని వరిజ్ విజేరిజ్ని నజిని నెగెండ స్టూణి గాయియు మిజి వందనమ్కు వెహ్టూనాన్. యా పట్టుమ్దు

పెర్ని డబ్బుజ్ లెక్క సుడఃజి అస్మికాన్ ఎరస్తు, నమ్మిత్తికాన్ ఆతి క్వార్తును మిజి వందనమ్కు వెస్సినార్.

24 మా ప్రబు ఆతి యేసు క్రీస్తుబాణిజ్ వన్ని దయాదర్శం మీబాన్ మనీద్.

25-26 మీ నమకమ్దు మిజి గటిజ నిల్పైజ్ దేవుణు అట్పాన్. నాను యేసుప్రబు వందిజ్ సువార్త సాటిసినివలె యాకదె వెస్సిన. నండొ కాలం దేవుణు డాప్తి ఇడ్డి మహి నిజమాతి మాట ఏలు దేవుణు వెప్తా మనాన్. ఏలు అయ నిజమాతి సువార్త మాటు సాటిస్తిజ్ ప్రవక్తరు రాస్తి మాటదానె క్రీస్తు వందిజ్ విజెరె నెసినార్. ఎలాకాలం మన్ని దేవుణు ఆగ్నదాన్ యా సువార్త విజు లోకాజ్ నెస్సిసినాన్. ఎందానిజ్ ఇహిజ విజెరె లోకుర్ నమ్మిజి లోజిదెజ్ ఇజి.

27 విజు వనకాజ్ నెసిని ఒరెండ్రె దేవుణుదిజ్, క్రీస్తుయేసుదాన్ ఎలాకాలం లోకుర్ పొగ్డిఃజి మనిర్. ఆమెన్.

Konda: కొండ బాసడు నెగ్గి కబ్బు
Konda Dora New Testament which was published in
2006

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 7 May 2025

840896da-3a66-5e43-9018-4a95a349d60c